

神機制敵太白陰經卷九

遁甲總序

○原脫總序二字今校補

經曰黃帝征蚩尤七十二戰而不克，夢金人引領長頭衣元狐之裘，而言曰：「某天帝之使授符于帝。」帝驚悟，求其符，不得。乃問風后、力牧、力牧曰：「此天帝也。」乃於盛水之陽築壇，祭之。俄有元龜巨鼈從水中出，含符致于壇而去。似皮非皮，似綈非綈，以血爲文，曰：「天乙在前，太乙在後。」黃帝受符，再拜於壇。是設九宮，置八門，布三奇六儀爲陰陽二遁。凡一千八百局，名曰「天乙遁甲式三門發五將具而征蚩尤以斬之」。蚩尤者，炎帝之後，與少昊治西方，主金。兄弟十八人，日尋干戈，恃甲兵之利，殘暴不仁。聞黃帝獨王于中央，將欲勝四帝，恃甲兵

於涿鹿黃帝至道之精其神無所倚其心無所適淡然與萬物合其一天道虧盈而益謙乃授黃帝神符而勝之使黃帝行蚩尤之暴蚩尤行黃帝之道則蚩尤得符而勝黃帝矣黃帝因蚩尤之暴則黃帝得符而勝蚩尤矣天道助順所以授黃帝符者欲啟聖人之心贊聖人之事也吉凶成敗在乎道不在乎符今取其一家之書以備參攷耳

此乃總序也今刪正

○篇前原題課式二字案誤式在後

日辰

甲乙仲

甲乙季

甲乙孟

○三乙字疑當作已

六甲

甲子乙丑至癸亥中間甲戌甲申甲午甲辰甲寅并甲子爲

六甲也

五子遁元

甲巳之日夜半生甲子乙庚之日夜半生丙子丙辛之日夜
半生戊子丁壬之日夜半生庚子戊癸之日夜半生壬子
陽遁 遁元 仲 孟 季 陰遁 遁元 仲 孟 季

坎 冬至一七四 小寒二八五 大寒三九六

艮 立春八五二 雨水九六三 驚蟄一七四

震 春分三九六 清明四一七 穀雨五二八

巽 立夏四一七 小滿五二八 芒種六三九

離 夏至九三六 小暑八二五 大暑七二四

坤 立秋二五八 處暑一四七 白露九三六

兌 秋分七一四 寒露六九三 霜降五八二

乾 立冬六九三 小雪五八二 大雪四七一

陽遁冬至後第一甲子爲上元第二甲子爲中元第三甲子爲下元 逆布三奇順布六儀

陰遁夏至後第一甲子爲上元第二甲子爲中元第三甲子爲下元 順布三奇逆布六儀

陽遁元用坎艮震巽四卦四卦各四十五日十二氣合一百八十日

陰遁元用離坤兌乾四卦四卦各四十五日十二氣合一百八十日

五日六十時爲一元五日竟一氣一氣用一元上中下陰

陽二遁三百六十日當一歲之用其五日四分之一各用
中元以通餘閏始終用之然則冬至閏餘二五八

經曰以通閏餘始終用之各用二五八是已五日之內與
日合者

凡用遁之法當知九星明九宮定八門審直符直事

九星

天蓬水常主一天芮土常主二天冲木常主三天輔木常主
四天禽土常主五天心金常主六天柱土常主七天任土
常主八天英火常主九

九宮

坎爲一宮坤爲二宮震爲三宮巽爲四宮中五宮乾爲六宮

兌爲七宮艮爲八宮離爲九宮

八門

休門常主一死門常主二傷門常主三杜門常主四開門常主六驚門常主七生門常主八景門常主九

直符

直符者六甲六儀是也甲子常爲六戊甲戌常爲六己甲申常爲六庚甲午常爲六辛甲辰常爲六壬甲寅常爲六癸
三奇

乙爲日奇 丙爲月奇 丁爲星奇

直事

直事者直八門事也常以直符加直事上門加直事授出入

之語

○句似有誤

故以其門各之直事五百一易局十時一易符十時

一易事

課式

凡課式之法常以直符加時干直符者六甲也時干者時下所用之干也假令陽用天元上元一局甲巳之日夜半生甲子卽子在甲時也授以直符天蓬加北方六戊所以加六戊者以甲子常爲六戊故也雞鳴乙丑授以天蓬直符加南方六乙盡癸酉十時皆以天蓬加至寅戌○此二字有誤甲戌則轉直符用天芮他皆倣此此其陽遁可知○此下當有脫誤

陰遁逆行 以直符直事加宮直事者直事上之門也時干者時下所得之宮也然則直符十時一易其門十時一易

也

○此條標目似誤然則上當有脫文其門下疑脫亦字

假令陽遁用天元中元七局甲巳之日夜半生甲子卽以驚門加第七宮雞鳴爲乙丑卽以驚門加八宮盡癸酉十時皆以驚門加宮至寅○二字亦誤甲戌則移生門加宮而奇門所在及爲吉凶成敗按而詳之他倣此陰遁則逆數

凡子加子直符直事各伏其位名曰伏吟子加午直符直事各易其位名曰反吟雖致奇門吉宿皆凶惟可以納財

凡三奇之日宜以出行奇者乙丙丁皆爲吉干與善神并故無凶耳若開休生三吉門有天上三奇合之臨一方卽其方之門爲吉道路清虛可以出行修舉百事皆吉

假令用陽遁天元一局甲巳之日日出爲丁卯天乙直符在

四宮開門臨震三宮下有六乙與日奇合東方出行吉生門臨離九宮有六丁與星奇南方可以出行其陰遁可知凡三奇直使者爲三奇得六甲所使奇也卽乙爲甲戌甲子使丙爲甲寅甲申使丁爲甲辰甲寅使三奇爲吉門合得此時者爲尤良

假令陽遁用天元上元一局用甲己之日日入癸酉天乙直使在一宮以直符天蓬加六癸休門直事加一宮北方休門下有六丙日奇而臨甲子■六丙所使者是也他皆倣此

凡三奇與生門合太陰合得人遁奇與休門合爲天遁奇與開門合得地遁奇與太陰所合皆吉常以六丁所合爲太

陰天乙后二宮亦名太陰

假令陽遁天元上元一局甲戌在坤宮爲直事前二宮乾六甲在二宮天乙在后二宮皆合于六宮故曰巽遁用陽他倣此

此條有脫誤

又生門與六乙合得人遁奇休門與六丁合得地遁奇開門與六丙合得天遁奇所合之宮所向皆吉

又生門與六乙合得天遁奇開門與六丙合得地遁奇休門與六丁合而在直符前三宮爲得人遁奇天遁奇者爲日精華所蔽地遁奇者爲月精華所蔽人遁奇者爲太陰之氣所蔽此時可以隱匿逃亡蔽蓋此宮有事出行吉

凡三奇合太陰而無吉門名曰有陰無門有門合太陰而無

奇名曰有門無奇有吉門而無奇陰名曰有奇無陰皆可從之吉但避五刑舉事但從三吉而去若不得三奇并吉門者但三奇所加百事從之吉

又三奇在陽宜爲客在陰宜爲主若欲見貴人求財舉事出自奇門合生門吉若力勝舉百事出自奇門合開門吉若欲求陰私舉百事出自奇門合休門吉

凡三奇遊于六儀利爲公私和會之事謂乙丙丁遊于六甲之上若甲寅有乙卯甲子有庚午此爲玉女守門戶之時也天乙合會利爲其事要在三奇在六儀者三奇吉門合太陰以勝光小吉從魁加地四戶是謂福倉遠行出入移徙皆吉

凡欲遠行出入舉百事逃亡當令天三門加地四戶出其下
吉天三門者太冲從魁小吉是也地四戶者除定危開是
也

假令正月建寅卽卯爲除午爲定酉爲危子爲開他倣此太
冲從魁小吉天之私門六合太陰太常地之私戶此■臨
開休生三奇吉門從之出入遠行舉百事皆大吉又以月
將加時上視之勿忘太冲太冲者天門也卒有急難天門
出吉凡三奇入墓凶不用

假令六乙日奇雖得日奇未時不可出謂乙屬木木墓在未
也丙丁火火墓在戌戌時不可出

一云六乙臨二宮六丙六丁臨六宮入墓出三奇吉門勿令

五刑魁星騰蛇白虎在其

凡九天之上可以力勝九地之下可以伏藏太陰之中可以潛形六合之中可以逃亡卽直符後一所臨之宮爲九天後二所臨之宮爲九地前二所臨之宮爲太陰前三所臨之宮爲六合

假令陽遁直符臨九宮則九天在四宮九地在三宮太陰在七宮六合在六宮他皆放此陰陽皆用天遁爲奇其九天臨甲九地臨癸太陰臨丁六合臨己爲大吉

凡六儀擊刑皆不可用

假令陽遁甲子天蓬爲直符加卯時爲擊刑謂子卯刑故也雖得奇門吉宿不可用三刑者子刑卯卯刑子丑刑戌戌

刑未未刑丑寅刑巳巳刑申申刑寅辰午酉亥四位自刑
凡六庚加直符名天乙伏宮格亦名天乙留符格直符加六
庚名天乙飛宮格亦名天乙行符與太白格六庚加天乙
名太白與天乙格戰于野若天乙與六庚同宮名天乙與
太白格戰於國 六庚加天乙宮者謂臨太乙所在地宮
也天乙與六庚同宮者謂此同地宮也凶時也

凡六庚加金日亦名伏干格亦名本宮干格之日干格加六
庚名飛干格此凶時不可爲百事伏干格之時凶外人取
之占賊見之占人在占格則不在占人來占格則不來

凡六庚加歲干爲歲格月干爲月格日干爲日格一曰六庚
加三奇爲時格不加三奇非時格六庚加六巳名刑格易

地千里車破馬驚不利舉百事凶

凡六庚加六丙名曰太白入熒惑六丙加六庚名熒惑入太白二逢相入皆凶時得奇門吉宿亦不可舉百事凶

凡六丙加直符爲勃謂天上六丙加庚直符也及天乙宮加六丙亦名爲勃同六庚所加之義

凡時下及天乙直使所在得吉宿者吉得凶宿者凶時下得吉宿謂直符所勝○疑時下所得三星此謂吉宿也

假令陽遁天元上元一局甲巳之日平旦爲丙寅卽以直符加六丙六丙在八宮八宮爲天任是謂時下得天任星也
他倣此

天乙所在吉宿者假令陽遁天元上元一局甲巳之日夜半

生甲子甲子爲天蓬卽以天乙直使在天蓬宿雞鳴爲乙丑乙丑爲天芮卽以天乙直使爲天芮宿

凡吉宿者天輔天禽天心爲大吉天冲天任爲小吉凶宿者天蓬天芮爲大凶天英天柱爲小凶大凶者有旺相氣變爲小凶小凶者有旺相氣變爲平其吉宿有旺相氣大吉凡六甲加六丙爲青龍返首六丙加六甲爲朱雀跌穴此二時可以造舉百事又會三奇八門者爲大吉太乙經曰六丙加六庚爲孛六辛加六乙爲白虎猖狂六乙加六庚名青龍逃走六癸加六丁名騰蛇天矯六丁加六癸名朱雀入江不可舉百事皆凶時也

凡時下得乙未丙戌辛丑甲辰戊辰名入墓時不得出入舉

百事

凡天道不違三五復反假令陽遁用天元上元一局甲巳之日平旦爲丙寅三卽三在寅也戊辰五卽五在辰也他倣此

其陽遁可出入舉百事當趨三避五可以名天道凡出行者亦可參用元女式三宮法所出之門有騰蛇白虎皆須避之不可犯大凶

○此下原衍亭亭答謂六乙之時時下得乙吉也十四字下十一字見時加六乙條與上不屬今刪

時逢六庚抱木而行強有出者必有鬪爭謂六庚之時時下得庚凶也

○此下四條當在時加六己條後疑錯簡

時逢六辛行逢死人強有出者罪罰纏身謂六辛之時時下得辛凶也

時逢六壬爲吏所擒強有出者非禍所勝謂六壬之時時下得壬凶也

時逢六癸衆人所視不知六癸出門則死謂六癸之時時下得癸凶也

凡時下得天蓬宜安居保國修築營壘主不利客凶神也

時下得天芮宜崇道修德統接朋儕凶神也

時下得天冲不利舉事凶神也

時下得天輔宜守道調理凶神也

時下得天禽宜祭祀求福以滅羣惡吉神也

時下得天心宜避疾求仙君子吉小人凶凶神也

時下得天柱宜居守自固藏形隱迹凶神也

時下得天任宜請謁賞賀通達財利吉神也

時下得天英宜道行出入進酒作樂嫁娶筵宴吉神也

太乙貴神可向不可背白姦者天大姦神不可向可背也

又曰六丁爲六甲陰能知此道日月可陸況可呼六丁神名

凡六合之中六已謂六已之位皆在六合之中也行陰密

隱祕潛伏之術皆從天公^{上疑}六已所臨用之

凡天輔之時有罪勿殺斧鉞在前天乙救之謂甲巳之日時

加巳乙庚之日時加申丙辛之日時加午丁壬之日時加

辰戌癸之日時加寅此時有罪自然光輝亦宜此時拔人

之繫縛

一曰甲巳之日時下謂巳丁壬之日時下謂辰戌癸之日時

下謂申爲夫輔之時也

凡天網四張萬物盡傷謂時得六癸也此時不可造作百事又神有高下必須避也 假令天網在一宮神高一只在二宮神高二尺踰越避之

凡天罡加四孟天乙在內宜處百事天罡加四仲天乙在門出處百事皆敗天罡加四季天乙在外宜出行百事皆吉他倣此

凡要事在三宮在天乙大吉加四仲名玉堂時天乙理事於玉堂之中欲出行當此之時百事可利逃亡者得

神后加四仲名明堂時天乙出遊門垣之外遊行四野當此之時舉造百事皆吉逃亡者得

徵明加四季名曰絳宮天乙伏藏於深宮之中行於私宴
當此之時不可出行逃亡者皆得用

凡天乙之理于三宮四時迭用要在于天乙大神背之必敗
當從向克

春三月天乙大神理于玉堂宮大吉是也大吉爲生氣其
冲小吉爲百鬼死

夏三月天乙大神理于明堂宮神后是也神后爲王坐其
冲勝光爲負

秋冬三月天乙大神理于絳宮徵明是也徵明爲常生其
冲太乙爲積刑

凡出入往來青龍上明堂出天門入地戶四入太華中卽華

蓋若天藏天獄天牢慎不可犯

凡六甲爲青龍可以建福六乙爲蓬星可以建德六丙爲明堂可以出入六戊爲天門可以往來六己爲地戶可以伏藏天乙至三凶神之宮六庚爲天獄六辛爲天庭六壬爲天牢天藏之中爲六癸可以隱藏也

凡九天之神在六甲朱雀之神在六丙太陰之神在六丁勾陳之神在六乙六合之神在六己白虎之神在六庚元武之神在六辛入地之神在六癸凡欲逃亡隱匿必須從天門入地戶又參之以太冲從魁小吉六合太陰加地戶將出入往來無能見者欲去者出天門而去欲藏者入地戶而藏太陰之中凡欲逃避百鬼當出天門入地戶中吉

凡欲行山中宿令虎狼鬼賊不敢近者出天門入地戶中吉
夫開門遁伏休門生聚生門利息景門上書杜門閉絕死門
射獵驚門恐迫傷門傷害避惡伏匿背杜門向開門吉出
行移徙遷官受職入官視事背景門向休門吉有所掩襲
欲塞奸邪背開門向杜門吉三奇吉門合天輔天心天禽
出入大吉出入開門宜見大將軍出休門宜見長吏出生
門宜見帝王公卿出傷門宜捕獵征伐出杜門宜邀遮隱
匿誅伐亡逆出景門宜上壽出死門宜喪葬弔唁出驚門
宜掩捕鬪訟

凡時加六甲一開一闔上下交接謂六甲之時時下得伏吟
時也

時加六乙一往一來恍惚俱出謂六乙之時時下得乙吉也

時加六丙道逢清甯求之大勝謂六丙之時時下得丙吉也

時加六丁出幽入冥永無禍侵謂六丁之時時下得丁吉也

時加六戊乘龍萬里當從天上六戊出挾天武而行吉也

時加六己如神所使不知六己欲行且止謂六己之時時下得己凶也

向背擇日

經曰征伐皆有向背知之者勝不知者敗其太歲太陰將軍
月建日時大時小時亭亭白姦遊都太乙黃旛豹尾五帝六
符生神死神大雄死地睢日德孤虛歲月日時刑殺大小審
而用之可以知其勝負易其成敗其臨○疑有脫誤神者惟死神
地睢虛星可向白姦亦可向

推五星所在法

常以天罡加太歲視亥上神爲歲星午上神爲鎮星酉上神
爲太白子上神爲辰星五星所在之次國不可伐大畧如
此爲星有遲速跳伏以七曜算之方定太歲月日時下之
辰不可向○午上神疑當爲熒惑鎮星上似有脫文

凡小時月逢大時月正月卯二月子三月酉四月午左行四

仲周而復始

凡遊都正月丙二月丁三月四月庚

推行八千四角天乙依元女式

所月遊者一名刑法己酉月理艮宮六日乙卯月理震宮
五日庚申月理巽宮六日丙寅月理離宮五日辛未月理
坤宮六日丁丑月理兌宮五日壬午月理乾宮六日戊子
月理坎宮五日陽歲以大吉陰歲以小吉

○依龍首經天乙日
遊法月並當作日

推恩建黃道法

常以正七月加子二八月加寅三九月加辰四十月加午五
月十一月加申六月十二月加戌

凡天罡下爲建建爲青龍黃道次神太乙卽爲除除爲明堂

黃道次神勝光卽爲滿滿爲天刑黑道次神小吉卽爲平
平爲朱雀黑道次神傳送爲定定爲金匱黃道次神從魁
爲執執爲天德黃道次神河魁爲破破爲白虎黑道次神
徵明爲危危爲玉堂黃道次神神后爲成成爲天牢黑道
次神大吉爲收收爲元武黑道次神公正爲開開爲司命
黃道次神太衝爲閉閉爲勾陳黑道次神

凡避死難從開星不吉春三月房爲開夏三月張爲開秋三
月婁爲開冬三月壁爲開

推亭亭白姦法

常以月將加時辰神后下爲亭亭所在次析十二月時其
寅申巳亥神后白姦所在神后時白姦在寅常行四孟亭

亭常以白姦囚于巳亥格于寅申

○此條有脫誤

出師安營一名真人玉女反閉局

經曰諸有正宿安營四直頓兵深入敵境恐有掩襲乃作真人閉六戊法逃難隱死作玉女反閉局法千凶萬惡莫之敢干故人精微去道不遠故能洞幽闡神非真人逢時必不能行也

閉六戊法

先置營訖于某旬上以刀從鬼門行起左旋畫地一周次取其中央之土一斗置六戊上六戊者天罡神也刀卽置取土之處理之咒曰太山之陽恒山之陰盜賊不起虎狼不傷城郭不完閉以金關千凶萬惡莫之敢犯便于營中

宿若令出入

有誤

驗之法取犢母在營中犢子安營外犢

子終不敢入營中甲子旬戊在辰餘倣此

玉女閉局法

以刀畫地常以六爲數室中六尺庭中六步野外六十步手持六算算長一尺二寸假令甲日從甲上入乙日從乙上入戊日從東西南北入局竟從今日日辰起

假令子日卽以第一算置子上第二算加丑上第三算加寅上第四算加卯上第五算加辰上第六算加巳上下六時亦依次去便呼云鼠行失窟入市

此有脫誤景祐通甲符應經作鼠行出穴入

狗市便逐

移

子上算置戌上度算訖大呼云青龍下次移

丑上算置卯上云牛入兔塗食時草

符應經作牛入兔園食甘草

度訖

就便呼云朱雀下次移寅上算置已上云猛虎跳鳶來到

。符應經云猛虎。虎。眈眈來入巳。度算。。似脫。便呼云勾陳下次移卯上算

置丑上云兔入牛欄伏不起便大呼云白虎下次移辰上

算置午上云龍入馬廐因留止度訖便呼云元武下次移

已上算置申上呼云騰蛇宛轉來。。似脫二字符應經云。騰蛇宛轉來申裡。度

訖便呼云六合下兩算夾一算先成爲天門後成爲地戶

避難出天門入地戶乘玉女上去吉仍呼玉女所在之庚

上玉女來護我。。之疑云符應經作若庚。上便庚上玉女來護我。無令百鬼中傷


我敵人不見我以爲束薪。。符應經句上有見我者三字。東原譌米。据符應經改。獨

開天門。。原本獨譌狗。据符應經改。而閉地戶呪會亥乎。。句有誤。會疑畢。以

算閉門而去勿反顧以刀畫地卽地脈不復得見。。句不。可解似。

有謫
脫

神機制敵太白陰經卷九終



神機制敵太白陰經卷十

雜式

元女式

元女式者一名六壬式元女所造主北方萬物之始因六甲之壬故曰六壬六甲之上運斗柄設十二月之合神爲十二將間置十干次列二十八宿三十六禽以月將加正時課日辰用爲天乙所理十二神將以斷吉凶成敗

推月將法

以十二月合神爲月將

登明正月將加在亥水神河魁二月將加在戌土神從魁三月將加在酉金神傳送四月將加在申金神小吉五月將加在未土神勝光六月將加在午火神天乙七月將加在

巳火神天罡八月將加在辰土神太冲九月將加在卯木神功曹十月將加在寅木神大吉十一月將加在丑土神神后十二月將加在子水神

推四維法

乾天門坤人門巽地戶艮鬼路

推三十六禽法

○諸禽頗有譌缺五行大義所述諸說紛紜無從是正又無別本可考姑仍原本

東方狸虎豹兔貉蛟龍魚蝦 南方蚓蛇狙鹿獐雁羊鷺

西方猿狢猴烏雞犬豕豺狼 北方熊猪鰐燕鼠蝠蟹牛鼈

推四課法

常以月將加正時視干日支辰陰陽以爲四課干日上神爲日之陽支日上神本位所得之神爲日之陰支支辰上神

爲辰之陽支辰上神本位所得之神爲辰之陰支謂之四課
四課之中察其五行取相克者爲用四課陰陽先以下賊
上爲用若無下賊上以上克下爲用若三上克下一下賊
上還以下賊上爲用若四上克下四下賊上與今日比者
爲用俱比俱不比涉害深者爲用涉害俱深以先
干後支爲用四課陰陽皆不相克以遙相克爲用若有干
克神神克干先以克干爲用若干克兩神兩神克干以比
者爲用俱比俱不比剛用干比柔用支比爲用四課陰陽
無上下相克又無遙相克以昴星爲用剛干視酉上所得
神爲用柔干伏視從魁所臨神爲用剛日先傳支後傳干
柔日先傳干後傳支若天地返吟伏吟先以相克爲用

若無相克伏吟剛干以干上神爲用柔干以支上神爲用
反吟剛干以干衝柔日以辰衝爲用以刑及衝用爲傳終
八專日四課不相見剛干從干上陽神順數柔干從支上
陰神逆數皆及三神爲用足以定吉凶當知所受用三傳
以考終始善惡所致何先何後變化何從將安所極三傳
之要訣在天宮各以神將言其禍福將以併合所加日辰
又以五行論其憂喜欲取諸將以天乙爲首

○原本錯亂參景祐六壬神定經改

推天乙所理法

天乙者貴人也家在丑甲戌之日旦理大吉暮理小吉乙己
之日旦理神后暮理傳送丙丁之日旦理登明暮理從魁
庚辛之日旦理勝光暮理功曹壬癸之日旦理太乙暮理

太冲天乙在東方西方則南方爲前北方爲後在南方北方則東方爲前西方爲後常以星沒爲旦星出爲暮

推十二神將法

用起天乙以將兵大勝闢地千里用起螣蛇以將兵兵數驚駭上下相克天乙前一神也用起朱雀以將兵士卒驚恐妄作口舌天乙前二神也用起六合以將兵戰勝得子女玉帛天乙前三神也用起勾陳以將兵士卒戰亡天乙前四神也用起青龍以將兵大勝天乙前五神也用起天后以將兵不勝自敗天乙後一神也用起太陰以將兵士卒怯弱天乙後二神也用起太常以將兵平平天乙後四神也用起白虎以將兵師亡天乙後五神也用起天空以將

兵士卒死亡爲敵欺詐天乙後六神也天乙理十一將前盡于五後盡于六

推伏吟返吟法

凡興師動衆勿取伏吟之時必見固守行者不坐坐者不起返吟時前勝後負諸神自臨其衝曰反吟諸神自臨曰伏吟

推陰陽相覆法

天罡加太歲是陽覆陰也天罡加月建是陰覆陽也陰陽相覆之時兵必有奸計重陽時執于火爲驚重陰時執于水爲恐陽覆陰君欲害臣陰覆陽內姦生不利舉百事凶

推神在內外法

斗加孟神在內道路壅塞出軍凶斗加季神在外出師吉斗

加仲神在門或戰勝密謀

推九醜法

乙戊己辛壬之日爲子午卯酉之神

○疑辰

合五得四交合爲

九醜主敗軍殺將醜惡之日故曰九醜己卯辛卯戊午戊子壬子壬午乙酉辛酉己酉是也

推兵讐法

仰見其兵暮見其辰俯見其讐下賊上比時軍兵僂將死亡
推行軍本命法

軍出日時天罡不欲臨將軍本命及行年大凶螣蛇白虎小凶天乙青龍六合太常臨小吉歲月殺所臨之方不可往
推天門地戶法

以天二門太衝從魁覆地四戶除定危開從下而出萬夫莫

當

○二疑當作三從魁
下疑脫小吉二字

推五帝法

春三月五帝任東出軍先鋒出城西門立營牙門向東常以
青旗居前赤旗次之次引白旗次引黑旗四時倣此不向
旺方也

推國君自將法

置營訖國君居北斗四星之下微明是也前將軍居太微下
勝光是也後將軍居華蓋下神后是也左將軍居天府下
太衝是也右將軍居文昌下從魁是也旗鼓居蓬星下六
乙是也偃衆居明堂下六丙是也軍門居天門下六戊是

也小將居地戶下六己是也斬殺居天獄下六庚是也判
事居天庭下六辛是也囚禁居天牢下六壬是也軍器居
天藏下六癸是也順旬依法不可妄舉起甲盡癸則復旋
改

推神位諸煞例

假令甲子旬子爲青龍丑爲蓬星寅爲明堂卯爲太陽辰爲
天門巳爲地戶午爲天獄未爲天庭申爲天牢酉爲天藏
終十辰至甲戌爲青龍餘倣此

推玉帳法

出軍行陣深入敵國止宿營壘休舍憩息大將軍居太乙玉
帳下吉攻之不得以功曹加月建前五辰是也

察情勝敗篇

武侯曰田螺占兵之法其來甚遠龜易卦占雖有正爻學者

不精吉凶難推

○二字据陽經補

葦蕒蠡曾用田螺占中間試之頗有靈驗

見兵書此乃古法也取田螺時須自淨其身勿令女人見之卽有靈驗

其法以甲乙日用溫湯向東灌之向夜取一大盤盤中畫一直墨界一邊爲己一邊爲敵注水一二升于盤內取二螺咒曰田螺索索風雨不作敵若不來各守城郭又咒曰田螺舞舞知風知雨敵若來迫入我城土咒訖明日視之若己入敵則己勝敵入己則敵勝

右準前法置田螺于盤內明日視其頭之所向定其緩急凡

甲乙日頭向南三日至向西七日至向北不來向東不戰
丙丁日頭向南九日至向西七日至向北卽至交戰主勝
向東不來 戊己日頭向南西北皆不來向東三日至
庚辛日頭向西與敵和向北無事向東敵來自敗向南九
日至 壬癸日頭向北吉向東三日至向南敵來自敗向
西不來

若春向東大勝向南小勝向西大敗向北平安
夏向南大勝向西小勝向北大敗向東小勝
秋向西大勝向北小勝向東大勝向南大敗
冬向北大勝向東自敗向南大勝向西自敗

推賊虛實法

常以月將加聞賊時天罡加四孟言虛加四仲來在道天罡加四季卽至欲知賊來否以月將加聞賊時遊都加日辰賊卽至臨前一辰一日至二辰二日至四辰以上過去不來遊都旺相克日辰凶

推天地耳法

欲知賊消息往天耳聽之大吉小吉是也欲聽人之密謀隱事往地耳聽之太衝從魁是也

推賊兵數法

以月將加正時日上辰見天罡河魁五百五千五萬人見徵明太乙四百四千四萬人見神后勝光六百六千六萬人見大吉小吉八百八千八萬人見功曹傳送九百九千九

萬人見太衝從魁十百十千十萬人見其神旺氣十倍相氣五倍死氣減半

推迷路法

道路三义不知何路可通以月將加時天罡加孟左道通天罡加仲中道通天罡加季右道通

推伏匿法

逃亡隱匿以月將加正時望奸下可藏萬人神后是也河龍下可隱千人太衝是也陰精下可藏百人從魁是也

推三河九江法

三河九江天道獨通太冲爲三河從魁爲九江欲行間諜爲不可知事視江河除定危開之道又前三後三并者可獨

通出入其下人無知者

推三陣法

甲子旬陣形象畢幟曰孔琳臨前左將青衣赤頭右將白衣赤頭從酉入以臨子甲戌旬軍形象并幟曰陵城降前左將黑衣赤頭右將黃衣赤頭從未入以臨戌甲申旬兵形象翼幟曰梁邱叔前左將黃衣赤頭右將朱衣赤頭從巳入以臨申甲午旬兵形象尾幟曰費陽多前左將白衣赤頭右將青衣赤頭從卯入以臨午甲辰旬兵形象斗幟曰許咸池前左將青衣赤頭右將黃衣赤頭從丑上入以臨辰甲寅旬兵形象虛幟曰王屈奇前左將赤衣赤頭右將黑衣赤頭從亥入以臨辰

推陰陽兵法

陽兵者以陽時出天門入地戶過太陰短行出九地六癸順入九地上升九天六甲百戰百勝

陰兵者以陰時從九天踐明堂出天門入地戶左行右回歷太陰分兵爲奇逆入太陰中楊■以採戰

○疑作楊兵以出戰

推雌雄法

用起戰雄吉春寅夏巳秋申冬亥用起戰雌凶春申夏亥秋寅冬巳今日之辰起其後二攻其前四子日後二戌前四辰是也復以大吉徵明神后天罡四神爲雄小吉天罡勝光三神爲雌戰陣背雌向雄百戰百勝不得令青抵白黑抵黃金迎火陰就陽子攻母迷天道戰必敗不欲向勝日辰

也攻其類衆還受其屈攻其所勝大吉勿使衰對相死當旺故曰通三天勝可全順斗行一也攻其勝二也後二攻前三也

推北斗戰法

左八八月攻左右二二月攻右是戰法也

推伏兵法

太冲神后傳送太乙臨日辰必有伏兵此神旺與殺併伏兵發大凶不與煞併伏兵不敢發

又曰以聞事時斗加季有伏兵千傷支有伏兵在前支傷千無伏兵千支俱傷爲用神有伏兵戰凶

推突圍法

傷不傷視陰陽日辰上賊爲傷又惡得將爲重傷則凶不傷無咎又用起陰傳出陽者可出必免難

又曰被圍時神在內可守神在門相傷神在外可出

又曰或在家或在野被圍四匝者當從青龍下去加旺時天罡是也所謂八極俱張刺如鋒鋌乘龍而出兵不敢當推水軍法

兵衆行船將涉江海必有傾覆之患丙子癸未癸丑法爲江

河龍

○疑當有脫誤此日濟必溺

又曰天河臨地井舟必覆壬癸小吉下得路爲天河

○疑當云

壬癸子

爲天河卯酉辰爲地井

推迷惑法

月將加正時若天罡若小吉下得路山林野澤烟霧昏蒙忽迷四方以式投地出傳送下自然開悟出天罡下百步得道若三百步得及路出小吉下八十步得道以天罡加地戶頭戴式行則不迷加正時出小吉下三百步得天井太冲下得水出大吉下得糧凡支吉利涉陸路在前不知通者正時加孟左道通加仲中道通加季右道通

主客向背篇

經曰衆兵大同則先舉者爲主後舉者爲客陳兵原野則先舉者爲客後舉者爲主

又曰天五音爲客地五音爲主五音官商角徵羽也

又曰辰爲客時下爲主辰行爲客位止爲主先動先聲爲

客後動後聲爲主高旗爲客卑旗爲主兩人相見外來爲客內坐爲主兩人相見立爲客坐爲主兩人等先舉事爲客後舉事爲主人有氣者勝無氣者敗客利四季月日時欲得制日干克支主人利四孟月日時欲得伐日支克干客利

推向背法

旌旗五色者軍之五德也輝映衆心宣威兵目青旗舉一鼓則行二鼓則趨三鼓則集受制也舉黃旗一擊令則止二擊令則列三擊則聽受命也陽時舉赤旗揚威儀而始之甲乙丙丁戊也陰時舉黑旗伏威儀而終之己庚辛壬癸也旛旗各隨方色而行甲子甲申甲辰三旬弧矢在前甲

寅甲午甲戌三旬刀盾在前春以長矛在前夏以戈戟在前秋以弓弩在前冬以刀盾在前

推二十八宿騎戰法

以二十八人象二十八宿爲先鋒軍壓敵

角人赤旗青衣青馬東方七人

羽人青旗黑衣黑馬北方七人

宮人白旗黃衣黃馬中央七人

徵人黃旗赤衣赤馬南方七人

商人黑旗白衣白馬西方七人

右以二十八人早近敵陣大呼若聞桴鼓擊柝之音我以商人爲前將兵象白虎也陣見火光以羽人爲前將兵象

元武也陣聞金石兵刃之聲以徵人爲前將兵象朱雀也
陣聞土人呼號者以宮人爲前將兵象勾陳也陣內寂無
聲者以角人爲前將兵象青龍也是爲五行厭勝之法

推五行陣法

木直陣以金方陣應之金方陣以火銳陣應之火銳陣以水
曲陣應之水曲陣以土圓陣應之土圓陣以木直陣應之
推當敵人法

背太歲當萬人大將軍當五千人太陰月建天魁三元五符
各當五千人天乙遊都五百人歲德月德日德壬方旬之
內生氣歲星豹尾歲建並可背不可向也

推神煞門戶篇

凡戰陣之法須避神煞兼明天門地戶克勝制敵實在乎此也

推大將軍法

孟歲以

○應麟
二字太明

勝光

午

仲歲以小吉

未

季歲以傳送

申

加歲支

天罡

辰

下是也

推豹尾法

天罡加太歲支功曹

寅

勝光

午

河魁

戌

有臨季者其下卽是

豹尾其冲是爲黃旛

推太陰法

常以功曹

寅

加歲支神后

子

下是已

推歲建破法

陽歲以大吉陰歲以小吉加太歲支魁下爲建罡下爲破陰
陽殺用

推歲星法

天罡加歲支亥上所見本位辰是也

推歲支干德法

從魁加歲辰功曹是己支德甲戌戊寅壬德自處乙丁己辛

癸任魁鄉也

○此文有誤當云甲丙戊庚壬德自處乙丁己辛癸在所合也

推歲殺法

天罡加歲支太乙

己從魁

卯

大吉

丑

有臨季者其下卽是歲

殺申子辰劫煞在己災殺在午天殺在未他倣此

推孤虛大煞天狗法

登明加歲支天魁下爲孤太冲天罡下爲虛旬下日同大煞
春午夏未秋酉冬子一名天地轉殺天狗孟歲巳仲歲酉
季歲丑 天時天罡加月建也

此文有脫誤

推天道黃道法

天道寅午戌月寅戌南方行午西北方行亥卯未月亥未東
方行卯西南方行申子辰月申辰北方行子東南方行巳酉
丑月巳西方行酉東北方行

推天耳天目法

春氏星乙下夏柳星丁下秋胃星辛下冬女星癸下是爲天
目也春箕星寅夏軫星巳秋參星申冬壁星亥是爲天耳也
推遊都虜都月合法

遊都爲都將甲己日大吉乙庚日神后丙辛日功曹丁壬日
太乙戊癸日傳送虜都爲天賊甲己日天罡乙庚日勝光
丙辛日登明丁壬日傳送戊癸日功曹月合常以月合神
上爲月朔之始順數之盡末日也

推三元法

上元甲子日起五宮中元甲子日起二宮下元甲子日起八
宮各以順日求之周而復始時同日法夏至後行反此

推亭亭白姦法

常以月將加正時神后下爲亭亭寅午戌上見孟春五本位

上是白姦

○春五二字有誤

推生死神法

常以功曹加月建神后下爲生神勝光下爲死神

推六害法

辰卯相害寅巳相害丑午相害子未相害申亥相害酉戌相害

推天門地戶法

子丑日天門在丙地戶在丁寅卯日天門在庚地戶在丁辰巳日天門在庚地戶在壬午未日天門在壬地戶在辛申酉戌亥日天門在甲地戶在癸

龜卜篇

河出圖洛出書聖人則之則靈龜負圖自河而出也是龜龍麟鳳四靈龜居其一託夢於元王何其賢也不避豫且之

網何其愚也生既不能全身避害死亦安能灼骨而知吉凶古人所以設此法者謂兵爲凶器戰爲危事聖人得之以興凡夫得之以廢不可輕舉矣愚人不自謂其愚皆自謂其智故立卜法假于陰陽亦惑愚人之心非爲智也太公曰著朽草也龜枯骨也安知聖人之智慮哉是知神亦不能自智聖亦不能自智贊聖人之事者其猶砥礪乎凡龜有五色隨其旺相而用之一龜之內有六廚左右翼君王用上尺有二寸大夫用中庶人用下後左足爲春前左足爲夏前右足爲秋後右足爲冬四季用中廚

經曰何知我神骨白如銀何知我聖千里路正又曰其骨須白其色須鮮其皮如蠟其界如法

龜有五兆以定吉凶一兆之中爲五段可以彰往察來內
高爲金外高爲火五曲爲木正直爲土頭垂爲水水無正
形因金爲名常以晴霧爲水一兆之中從頭分爲五鄉頭
爲甲乙次爲丙丁次爲戊己次爲庚辛次爲壬癸常以頭
微高爲上兆正橫爲中兆春夏以內爲頭秋冬以外爲頭
假令木兆甲乙鄉爲本宮丙丁鄉爲子孫戊己鄉爲妻財庚
辛鄉爲官鬼壬癸鄉爲父母但以此鄉斷吉凶及支入兆
假令木兆金支是官鬼木支是兄弟土支是妻財火支是
子孫水支是父母看支入鄉以斷吉凶成敗我往攻彼則
彼爲主兆欲頭伏足落及格橫身內摧折暗霧昏驚震動
猖狂支不食墨火天穿者破軍殺將彼來攻我兆欲頭仰

足舉彼支援助身內有力食墨鮮明肥濃安穩兆吉言吉
兆凶言凶萬端吉凶一看兆身往往有驗無假日辰夫有
動不如無動有支不如無支有支則被支吉格支凶故兆
連新起動由人新兆連故起動無路 捉頭足所作不成
頭足銜芒所求無累君子動頭天下同憂小人動足天下
馳逐兆身過度日向衰微兆不出曰勢將微滅凡占賊被
支有外救格支有外敵若吾擊敵兆旺相洪潤軒昂有力
重偃仰吉枯槁伏落霧悴驚摧分伏足落兆細而暗凶凡
卜以支及動鄉賊數日月遠近里數生數三成數八旺相
依數休廢減半

凡卜兆爲我爲客支旺克兆客勝支囚爲兆所克客敗支洪

潤賊強支枯槁賊弱

人飛鳥出林兆出軍行師吉安營入師凶

尸飛鳥入林兆安營築城吉行師凶

工驚獐兆有賊奄至防閑城堡吉

爪走鹿兆有賊至主奔走之事

一土兆大橫安城堡社吉

八棲鳳兆自守吉

古需兆安城壘吉

川天兆城壘襲人吉

山岡營壘

山有岡巒地有形勢斷其形則氣勢滅故秦築長城鑿其山

岡之氣而咸陽邱墟隋疏汴河斷乎土地之脈而江都荆
棘成周卜遷伊洛得漣澗之利而王年八百吳晉奄宅建
業得江山之勢而延期數葉夫建都邑築城壘必擇形勢
雖成敗在人不在于城地然地形山勢足以爲人之助也
故曰趙之地坦然平吳楚之地東南傾秦韓之地龍虎形
幽魏之地無邱陵夫趙無陂險山岡溝澗故曰坦然平吳
楚之有江海波潮故曰東南傾秦韓被山帶河岡巒重複
故曰龍虎形秦得龍虎之形而東吞趙魏南併荆楚夫建
都邑列營壘非地勢不王非山岡不固營壘之法欲北據
連山南憑高岡左右襟帶地水東流乾上伏下過子良寅
卯重岡入巽

又曰戊連申酉坤未高前有迎山抱且朝或驚或躍或蟠
龍藏車隱馬若飛鴻支條散脈如蛇走氣車森聳似雞籠
四維皆起四仲平吳水迤邐出自庚天門倚伏歷壬癸直
出地戶東南傾南有汙池爲朱雀北有堆阜爲元武東有
叢林爲青龍西有大道爲白虎四獸旣具八卦乃列乃立
表測影以定子午之位興土工先本戊上起版築從中步
至門夫草木不生不可居鳥獸不集不可居燹石沙礫不
可居河水逆流不可居朱雀無頭元武折足白虎銜尸青
龍悲哭強居之者兵敗將死

山形岡隴

山若蟠龍玉案數重宛轉邪曲首尾相從山若鳳皇翹翼開

張羣隊千萬帶隴扶岡前有印綬後有回翔山若飛龍首
尾遠同或驚或躍乍橫乍縱臺傾池潤舞鶴翔鴻山若臥
狗頭拳尾就腹內乳見項連山首山若麒麟乍立乍蹲羣
從千萬朝者數人山若長蛇或曲或邪後岡前谷隱馬藏
車凡此皆營壘之形勢也

神機制敵大白陰經卷十終

太白陰經跋

昭文張氏刻太白陰經十卷跋稱從影宋抄本錄出較

四庫全書本多二卷與唐宋藝文志合首有李筌自序序後有內侍高班品趙承信等列銜五行與錢遵王讀書敏求記所稱本合惟少御書祇候臣錢承顥勘一行或傳寫失去壬辰夏偶得舊抄本六卷以之互校卷三將軍篇張刻僅存其目卷五搜山燒草前茅後殿釁鼓屯田入糧馬料軍資宴設音樂等七篇則并其目而佚之其卷六陣圖竟有大不類者更以通典所引太白陰經校之合於舊抄者十之七八合於張刻者十之一二張刻多以意改竄證以舊抄本痕迹宛然然則所謂影宋云云者猶在真贋之間也惜舊抄闕末四卷

無從校補今定前六卷主舊抄本七八卷主

文瀾閣本仍參合異同於下惟九十兩卷則仍依張刻付梓
云庚子長夏金山錢熙祚識

守城錄

欽定四庫全書提要

守城錄四卷宋右正議大夫陳規在德安禦寇事蹟也
規字元則密州安邱人中明法科靖康末金兵南下荆
湖諸郡所在盜起規以安陸令攝守事連敗劇寇建炎
元年除知德安府擢鎮撫使羣盜先後來攻隨機捍禦
皆摧破去尋召赴行在又出知順昌與劉錡同却金兵
又移知廬州兼淮西安撫使卒乾道中追封忠利智敏
侯立廟德安事蹟具宋史本傳是書凡分三種首爲規
所撰靖康朝野僉言後序朝野僉言本夏少曾作備載
靖康時金人攻汴始末規在順昌見之痛當日大臣將
帥捍禦失策因條列應變之術附於各條下謂之後序

徐夢莘嘗採入北盟會編一百三十九卷中然其文與此大同小異疑傳錄者有所刪潤也次曰守城機要亦規所作皆論城郭樓櫓制度及攻城備禦之方宋史本傳載規有攻守方畧傳世疑卽此書次曰建炎德安守禦錄乃瀏陽湯瑋作瑋淳熙十四年進士官德安教授尋訪規守城遺事作爲此書紹熙四年除太學錄乃表上之案規本傳載乾道八年詔刻規德安守城錄頒天下爲諸守將法藝文志亦別有劉荀建炎德安守禦錄三卷而無瑋書之名疑荀所撰者卽乾道所頒之本瑋書上於紹熙時距乾道已二十餘年或又據荀書而重加增定歟三書本各自爲帙不知何人始併爲一編觀

書末識語則寧宗以後人所輯矣宋自靖康板蕩寓內
淪胥規獨能支柱經年不可謂非善於備禦然此僅足
爲守一城乘一障者應變之圖而不足爲有國有家者
固圉之本當時編爲程式原欲令沿邊肄習漸保殘疆
然至元師南下直破臨安復爲東京之續究未聞有一
人登陴以抗敵者豈非本根先撥雖有守禦之術亦無
所用歟伏讀

睿題闡晰精微抉汴梁喪敗之由申守在四夷之訓夫然後
知保邦謔命自有常經區區輸攻墨守之技固其末務
矣謹錄存是帙以不沒規一事之長並恭錄

宸翰弁於簡端俾天下萬世知

聖人之所見者大也

御製題陳規守城錄

攝篆德安固守城因而失事論東京

陳規於靖康丙午羈德安府事羣盜王在等攻

城規在城上問賊何因到此賊言東京已破規初不信迨城遁遣人詣都城奏功始知城果陷因嘆當時身不在圍城中

以効守禦並論官吏將帥應敵捍禦之失更因靖康朝野僉言於所載攻守各條下附以已見並爲之序陳規屢

禦應之暇

守城機要備載陳規守德安事自城郭門牆樓櫓之制以及攻城備禦之方凡四十餘條極爲詳備

又載羣賊王在等攻德安未兩月而退張世李孝義四日引去楊進十六日引去孔彥舟三次皆不克而去董平三萬人

卽日敗去趙壽亦三日引去曹成李宏閻九月始引去桑仲夏邢尚孫羣賊閱三月引去李橫則六十五日引去前後應

敵機宜紀載甚悉其後瀾陽人湯壽編爲德安守禦錄表上其書欲沿邊守宰共爲紬繹其意固善夫陳規力保危城九

遇賊至皆隨機應敵卒賴安全可謂長於守矣但此特施之郡邑用得其人或見功效然因幸遇小寇耳若宋靖康汴京

之失則由於平時政事之乖違豈盡係臨時捍禦之疎湯壽畧彼時卽陳規果在圍城又安能救其敗亡之禍乎

深知紀以精小縣旁州或可賴通都大邑轉難行四夷守在

垂明訓逮迫臨衝禍早成

守城錄卷一

四庫全書原本

守山閣叢書 子部

宋陳規撰

金山錢熙祚錫之校

陳規靖康朝野僉言後序

靖康丙午規以通直郎知德安府安陸縣事丁未春正月羣盜王在等犯德安府時郡將闕規攝府事賊來攻城規在城上與賊語問何因到此賊言京城已爲金破規獨念都城之大壕塹深闊城壁高厚實龍淵虎壘况禁旅衛士百萬雖金人乘我厄運一時彊盛亦何能破殆不足信二月四日賊遁遣人詣都城奏功還乃知京城果爲敵陷徒深痛切但不知城破之所以然爾又恨當時不得身在圍城中陪守禦之知以効綿薄紹興己酉春三月朝廷旣復河南規自祠宮被命

知順昌府夏五月到官行及期年暇日會同僚語及靖康之難汝陰令云嘗收東齋雜錄一編中有靖康朝野僉言具載金人攻城始末規得之熟讀痛心疾首不覺涕零嗟乎治亂彊弱雖曰在天有數未有不因人事得失之所致也揚雄所謂天非人不因人非天不成靖康京城之難若非人事之失則天亦不得而爲災規不揆至愚竊觀金人攻陷京城朝廷大臣與將吏官帥應敵捍禦之失雖既往不咎然前車之覆後車之戒事有補於將來不可不備論也朝廷欲再援太原大臣以爲中國勢弱敵勢方強用兵無益宜割三鎮以賂之殊不知勢之彊弱在人爲我之計勝彼則彊不勝彼則弱若不用兵何術以壯中國之勢遏敵人之則用之彊有彊有弱

不用則終止於弱而已彊者復弱弱者復彊彊弱之勢自古無定惟在用兵之人何如耳

河東宣撫使統兵十七萬以援太原又招河東義勇禁兵五萬其兵二十二萬皆敗績致太原陷於敵非兵不多蓋用兵之失也其所以失者兵二十二萬直行而前先鋒遇敵者有幾一不勝而却與其後大兵皆却宜乎不能援也有識者觀之不待已敗而後知其不能援也殊不知攻城者分攻城兵備戰兵運糧兵扼援兵若兵不多則攻必不久而速退又不待其援也假使當時往援者將良得計雖無兵二十二萬只十萬亦可以必援又無十萬只五萬亦可以優爲之援也又不五萬至其下亦有可援之理且以五萬爲率若止分爲五

十將留十將護衛大將兼備策應內外三兩將詣扼援兵前
廣張兵勢牽制扼援之兵以二十將分地深入敵境縣亘可
布三五十里不知敵人用兵多少便能盡害以二十將周圍
行偏僻小路尋求鄉導多遣遠探向前設伏伺望敵人打糧
出兵多則退之少卽擒之但絕其糧道不必深入直抵城下
其賊自退又且兵旣分遣則人力並用假令數將失利其大
兵必不至於一齊敗衄潰散爲盜京城之難其源在於援太
原之失利也

尼瑪哈

舊作粘罕
今改正

攻太原之壽陽壽陽城小而百姓死守凡

三攻殘敵之衆萬人而竟不拔此必守城人中有善爲守禦
之策者僉言以爲城小而百姓死守者非也攻城者有生有

死善守者有生無死壽陽之人可謂善守而不得謂之死守
又或云城小而堅者亦非也若城太小矢石交通善守者亦
難以設險施策規以爲城愈大而守愈易分段數作限隔則
易守若已先策定險備設使賊欲登城縱令登城已登卽死
賊欲入城引之入城已入卽死今夫百里之城內有數步之
地賊人登之守城之人便自甘心伏其城拔乞命於賊者非
攻之善乃守之不善也

九月安砲於封邱門外大砲數百座皆在門外賊至不收遂
爲金人所得咸謂金人得攻城之具規以爲破亦不在此有
善守者假使更資砲數百座亦必無害在於禦砲之術善不
善也統制官辛康宗以賊去城遠止兵不得發箭止之甚善

百姓鼓衆擊殺此亦見其自亂素治之術失也

敵先採濕木編洞屋以生牛皮蓋其上戴之令人運土木填壕欲進攻城守城人若得計則城內先施大砲碎之亦可用單梢砲取遠至二百五十步外者制其首領用衆之人蓋益州郡舊有朝廷所降守禦冊定格單梢砲上等遠至二百七十步中等二百六十步下等二百五十步不知京城當時倉卒之際此格用與不用若人稍不究心則下等二百五十步亦莫能及若能究心則二百七十步過之甚易又以小砲禦近衆其小砲每十人已上不過十五人施放一座亦可以致數十涉勿謂小砲不能害物中人四肢則四肢必折中腰以上則人必死中馬亦然又況大砲每放一砲小砲可放數砲

不必用石以重三四斤泥圓爲之泥圓之利亦博不獨放時
易得無窮放去中人人必死傷不中則泥圓爲砲擊破不致
反資敵用若要摧毀攻城械則須用大砲及石金人攻城用大
砲蓋欲摧壞城樓守城者欲摧毀敵人攻城大砲與小砲齊
用縱敵在城外伐大木爲對樓雲梯火車等攻城械可以破盡
金人廣列壘石砲座尋碑石磨盤石羊虎爲砲欲攻之所列
砲座百餘飛石如雨擊守城之卒死傷日不下一二十人此
非攻城之能蓋守禦官一時失計耳苟守禦官得計止令卒
近女頭牆坐立城外砲來高則於女頭牆上過低則打中女
頭牆擊破在外無緣中人一卒亦不至於死傷日不下一二
十人者惟女頭牆稍加高厚則愈加安堵又須先用稍大木

造高一丈長一丈闊一丈上下外直裏斜外密裏稀洞子外密處以大麻繩橫編如荊竹笆相似以備砲石衆多攻壞女頭牆卽於兩邊連珠進洞子向前以代女頭若此則砲石縱大數多未易損壞間有損者卽逐旋抽換假令只如此禦捍則砲石亦何能害人已可必其無虞也

敵以雲梯對樓攻東水門其間禦捍有設重樓獲勝者固甚善也又恐人在重樓之上愈招矢石又攻東門守禦官守具亦備對樓雲梯至每以木衝倒仆死者無數此亦奇策然持衝木人與對樓上人相對不免互傷亦非全勝金人填壕橋成運對樓過壕攻城城下列砲座二百餘所七梢砲撒星砲座石砲並發又以强弩千餘助之城上矢石如雨使守禦卒

不能存立然後推對樓使登城每對樓上載兵八十人一對樓得城則引衆兵上此金人攻城之方也其砲大數多矢石齊發只前說女頭牆次備以洞子皆可隔盡矣對樓登城每一對樓果能載兵八十人樓廣不過二丈當面立得幾人與守城人接戰者不過十數人而已假令八十人盡用力施設五對樓止四百人此外必無伏兵亦無奇兵樓高須及五丈乘高而來其跡亦自甚危自履危地來與城上立平地人接戰勝負人人可以自決若守城者於此不勝則交戰於平田廣野之地不知其敗若何況對樓填平壕上惟可以直進直退必不能於城下橫行守人備禦不過止備對樓所占之地假使有十對樓所占地步數亦不多不獨接戰可以必勝縱

兵上城獲全勝者術亦多矣不思則弗得也

敵用雲梯止要登城每座雲梯須十餘人可以負荷到城城上禦之亦難向前來縱不禦之使敵倚城登梯上至城頭少不死者何以致之於女頭牆裏鵲臺上靠牆立排叉木每空闊三四寸一根通度槍刀向上高出女頭牆五六尺敵至女頭牆上必爲排叉木隔住背後乘空守禦人於木空中施槍刀刺擊豈有刺擊不下者下而不死者鮮矣

閏十一月二十四日再攻推對樓五座盛矢石來城上以竿衝倒三座城上士卒爭持草以焚之對樓木多而草盛火熾火乘南風遂引燒城上樓子三座對樓旣倒在城外必不能却回亦不能再起自是堵住敵人攻械來路可以置而不問

焚者失也縱不引燒城樓止燒了敵人對樓亦是城上人自持草火與敵燒開再進攻械來路此事大失所有再造城樓骨格欲於舊處安立者以理度之自是敵必不容矢石必倍守禦官若能用前說造洞子於闕樓子處兩頭連珠並進不終日決可蔽合權代女頭牆以隔矢石矢石雖愈倍於前亦必無害次於燒了城樓處兩頭橫直深埋排叉木以防敵急登城上分甲兵兩向攻打城裏從下斜築向上至城面外垠向下陡峻次於城裏脚下取土爲深壕離壕三五丈築月城圍之使敵乘對樓到城如不下對樓上城却回則已若上城必自立不得倒入壕內無不死者如此一挫必罷攻退兵乃守禦之人失之以致城陷豈不痛哉凡攻守之械害物最重

其勢可畏者莫甚於砲然亦視人之能用與不能用耳若攻城人能用而守城人不能禦之則攻城人可以施其能若守城人能用則攻城人雖能者亦難施設竊聞金人用砲攻城守禦人於城上亦嘗用砲城面地步不廣必然難安大砲亦難容數多雖有砲臺砲臺地步亦不甚廣又砲纔欲施放敵人在外先見必須以衆砲來擊又城上砲亦在高處自然招城外敵人用砲可以直指而擊之以此觀當時守禦之人其不能用砲也明矣假令當時於城裏脚下立砲仍於每座砲前埋立小木爲衣敵人在外不見立砲所在雖有能用砲者何由施設或謂砲在城裏砲手不能見得城外事無由取的每一座砲別用一人於城上專管城裏一座外照物所在裏

照砲梢與外物相對卽令施放少偏則令砲手畧少那脚太偏則就令拽砲人擡轉砲座放過則令減人或用砲稍大者不及則令添人或用砲稍小者照料得一砲打中後砲少有不中又城裏立砲可置數多守禦人用砲若止能如此則攻城人用砲何能爲也

築城之制城面上必作女頭牆女頭中間立狗脚木一條每兩女頭中掛搭篴籬惟可以遮隔弓箭於砲石則難以遮隔若改作平頭牆不用篴籬只於近下留品字方空眼與女頭相似亦甚濟用

或問何以備禦城外脚下自有馬面牆兩邊皆見城外脚下於牆頭之上下害敵之物當敵人初到城下觀其攻械勢恐

難遏宜便於城裏脚下取土爲深闊裏壕去壕數丈再築裏城一重對舊城門更不作門却於新築城下緣裏壕入三二里地新城上開門使人入得大城直行不得須於裏壕垠上新城脚下繚繞行三二里方始入門若此則假使敵善填壕止不過填得裏壕若由門入城須行新城脚下裏壕垠上新城上人直下臨敵何物不可施用正是敵人死地必不敢入由正門入城尚且不敢則豈肯用命打城但只如此爲備則敵兵雖多攻械百種誠可談笑以待之矣又況京師舊城亦自可守若逐急措置便可使勢如金湯有不可犯之理兼京城之內軍兵百姓金銀粟帛計以億兆之數亦莫能盡若令竭力修作不獨添築一城一壕可不日而成假令添築城壕

數重亦不勞而辦重城重壕旣備然後招敵人入城議事彼若見之必不攻而自退俗諺云求人不如求己古人云上策莫如自治又事貴制人不貴制於人皆此之謂也

京城周圍地約一百二十里聞當時敵在城外諸門多閉有以土實者止開三兩門通人出入如此乃是自閉生路而爲敵開其生路也爲守之計不獨大啓諸門仍於兩門之間更開三兩門使周圍有門數十座齊門於城內運土出入填壕作路使戰兵出入無至自礙城上覘望敵人空隙稍得便處卽遣兵擊殺或夜出兵使敵在外所備處多晝夜備戰無有休息彼自不能久攻兼旣城內創開城門自運土填壕欲爲出兵計則其在外填壕欲入之計不攻自破然所以敢自矧

開城門出填壕者非謂敵兵可欺蓋恃其自於城內設險已
備引敵入城而敵必死耳晉王浚遣都護王昌及鮮卑段疾
陸眷末杯等部五萬之衆以討石勒諸將皆勸勒固守以疲
寇獨張賓孔萇以爲可速鑿北壘爲突門二十餘道勒卽以
萇爲攻戰都督造突門於北城鮮卑入屯北壘勒候其陳未
定躬帥將士鼓譟於城上會孔萇突諸門伏兵俱出擊之生
擒末杯疾陸眷等衆皆奔散萇乘勝追擊枕尸三十餘里獲
鎧馬五千匹此乃守中有攻可謂善守城者也後之守城者
何憚而不法歟

州郡城池之制人皆以爲盡善城上有敵樓而敵人用大砲
摧擊城高數丈而敵人用天橋鵝車對樓慢道雲梯等攻具

登城據其城池之制作可以自謂堅固前古所未有奈何敵人攻械之備亦前古所未有故事貴乎仍舊而人憚於改作皆不可必者古人所謂利不百者不變法功不十者不易器以今城池之制觀之雖利不至於百功不至於十然自古聖人之法未嘗有一定之制可則因否則革也爲今之計如敵樓者不可仍舊制也宜於馬面上築高厚牆下留品字樣方徑及尺空眼以備覘望及設施槍路牆裏近下以細木蓋一兩架瓦棚可令守禦人避寒暑風雨屋在牆裏比牆低下則砲在外雖大而數多施設千萬悉莫能及人

壕上作橋橋中作弔橋暫時隔敵則可若出兵則不能無礙宜爲實橋則兵出入俱利

城門宜迂迴曲折移向裏百餘步置不獨敵人矢石不入其舊作門樓處行入一步向裏便是敵人落於阱何謂落阱蓋百步內兩壁城上下臨敵人應敵之具皆可設施又於舊門前橫築護門牆高丈餘兩頭遮過門三二丈城門啓閉人馬出入壕外人皆不見孰敢窺伺

城外腳下去城二丈臨壕垠上宜築高厚羊馬牆高及一丈厚及六尺牆脚下亦築鵲臺高二三尺闊四尺鵲臺上立羊馬牆上亦留品字空眼以備覘望及通槍路亦如大城上女頭牆牆裏鵲臺上栽埋排叉木以備敵填平壕塹及攻破羊馬牆至城脚下則敵於羊馬牆內兩邊受敵頭上大城向下所施矢石卽是敵當一面而守城人三面禦之羊馬牆內兵

賴羊馬牆遮隔壕外矢石是羊馬牆與大城係是上下兩城相乘濟用使敵人雖破羊馬牆而無敢入者故羊馬牆比大城雖甚低薄其捍禦堅守之效不在大城之下也又羊馬牆內所置之兵正依城下寨以當伏兵不知敵人以何術可解若此則既有羊馬牆而鹿角木可以不用仍於大城上多設暗門以備遣兵於羊馬牆內出入又羊馬牆脚去大城脚止於二丈不令太遠者慮大城上拋擲磚石難過牆外反害牆內人又不令太近者慮其大窄難以回轉長槍又於大城裏城脚下作深闊裏壕裏壕上向裏度地五七丈可作來往路外築裏城排叉木但多備下敵攻城應敵處用此以設備雖使敵人善攻不足畏也墨翟宋大夫善守禦公輸般爲雲梯

之械將攻宋墨子見之乃解帶爲城以裸爲械九設攻城之機墨子九拒之公輸般攻械盡墨子守有餘公輸屈曰吾知所以拒我者以此見攻械者宜乎古人以爲策之下也夫守城者每見敵人設一攻械而無數策以拒之者未之思也規嘗聞孫子曰兵者國之大事死生之地存亡之道不可不察也又以爲兵者詭也用無中形詭詐爲道故能而示之不能用而示之不用近而示之遠遠而示之近攻其不備出其不意此兵家之勝不可先傳也然而有傳之於家而達之於遠有利而無害有得而無失者不可不先傳也嗟乎靖康丙午金人以兒戲之具攻城守禦者一時失計遂致城拔迄及一紀有餘而金人猶不思當時幸勝尚以驕氣相陵規於未知

金人攻城設砲之前每見人云金人攻城大砲對樓勢豈可
當貴顯言之則快然而不敢辯衆人言之則亦不敢痛折今
旣知其詳則豈可不盡曲折剖其所見而言之然用兵之道
以正合以奇勝善出奇者無窮如天地不竭如江海千變萬
化人何能窮之今止據金人攻城施設畧舉捍禦之策至於
盡精微致敵殺敵之方雖不憚於文繁而有所謂真不可示
人者未之傳也又況雖欲傳之有不可得而傳者矣惟在乎
守城之人於敵未至之前精加思索應變之術預爲之備耳
區區管見輒序於僉言之後紹興十年五月日陳規序

守城錄卷一

守城錄卷二

陳規守城機要

一城門舊制門外築甕城甕城上皆敵樓費用極多以禦尋常盜賊則可以遮隔箭鏐若遇敵人大砲則不可用須是除去甕城止於城門前離城五丈以來橫築護門牆使外不得見城門啓閉不敢輕視萬一敵人奔衝則城上以砲石向下臨之更於城門裏兩邊各離城二丈築牆丈五六十步使外人乍入不知城門所在不可窺測縱使奔突入城亦是自投陷穽故城門不可依舊制也

一護門牆只於城門十步內橫築高厚牆一堵亦設鵲臺高二丈牆在鵲臺上高一丈三尺脚厚八尺上收三尺兩頭遮

過門三二丈所以遮隔衝突門之啓閉外不得知縱使突入牆內城上砲石雨下兩邊羊馬牆內可以夾擊

一城門貴多不貴少貴開不貴閉城門既多且開稍得便利去處卽出兵擊之夜則斫其營寨使之晝夜不得安息自然不敢近城立寨又須爲牽制之計常使彼勞我逸又於大城多設暗門羊馬城多開門竇填壕作路以爲突門大抵守城常爲戰備有便利則急擊之

一城門舊制皆有門樓別無機械不可禦敵須是兩層上層施勁弓弩可以射遠下層施刀槍又爲暗板有急則揭去注巨木石以碎攻門者門爲三重却後一門如常制比舊加厚次外一重門以徑四五尺堅石圓木鑿眼貫串以代板不必

用鐵葉釘裹又外一重以木爲柵施於護門牆之兩邊比之一樓一門大段濟事

一城門外壕上舊制多設釣橋本以防備奔衝遇有寇至拽起釣橋攻者不可越壕而來殊不知正礙城內出兵若放下釣橋然後出兵則城外必須先見得以爲備若兵已出復拽起橋板則緩急難於退却苟爲敵所逼逐往往溺於壕中此釣橋有害無益明矣止可先於門前施機械使敵必不能入拆去釣橋只用實橋城內軍馬進退皆便外人皆懼城內出兵晝夜不敢自安

一千戈板

亦名兼板

舊制用鐵葉釘裹置於城門之前城上用轆

轡車放亦是防遏衝突其礙城內出兵則與釣橋無異旣於

城門裏外安置機械自可不用干戈板以爲出兵快便之利
一城身舊制多是四方攻城者往往先務攻角以其易爲力
也城角上皆有敵樓戰棚蓋是先爲隄備苟不改更攻城者
終是得利且以城之東南角言之若直是東南角攻則無足
畏砲石力小則爲敵樓戰棚所隔砲石力大則必過入城裏
若攻城人於城東立砲則城上東西數十步人必不能立又
於城南添一砲則城上南北數十步人亦不能立便可進上
城之具此城角不可依舊制也須是將城角少縮向裏若攻
東城卽便近北立砲若攻南城則須近西立砲城上皆可用
砲倒擊其後若正東南角立砲則城上無敵樓戰棚不可下
手將城角縮向裏爲利甚不可忽也

一女頭牆舊制於城外邊約地六尺一箇高者不過五尺作山字樣兩女頭間留女口一箇女頭上立狗脚木一條挂搭皮竹篴籬牌一片遮隔矢石若禦大砲全不濟事又女頭低小城外箭鑿可中守禦人頭面須是於城上先築鵲臺高二丈闊五尺鵲臺上再築牆高六尺厚二尺自鵲臺向上一尺五寸留方眼一箇眼闊一尺高八寸

徑一云方

及尺

相離三尺又置

一箇兩眼之間向上一尺又置一箇狀如品字向上作平頭牆敵上登城只於方眼中施槍矛自可刺下方眼向下自有平頭牆卽是常用篴籬牌掛搭不必臨時施設也更於鵲臺上靠牆每相去四寸立排叉木一條高出女牆五尺橫用細木夾勒兩道或三道攻城者或能過品字眼亦不能到平頭

牆上更兼牆上又有排叉木限隔若要越過排叉木必須用手攀援則刀斧斫之鎗刃刺之無不顛仆守者用力甚少攻者必不得志也

一馬面舊制六十步立一座跳出城外不減二丈闊狹隨地利不定兩邊直覷城脚其上皆有樓子所用木植甚多若要畢備須用氊皮挂搭然不能遮隔大砲一爲所擊無不倒者樓子旣倒守禦人便不得安或謂須豫備樓子隨卽架立是未嘗經歷攻守者之言也樓子旣倒敵必以砲石弓弩併力臨城則損害人命至多亦不可架立今但只於馬面上築高厚牆中留品字空眼以備覷望又可通過鎗刀靠城身兩邊開兩小門下看城外可施禦捍之具牆裏造瓦厦屋與守禦

人避風雨遇有攻擊便拆去瓦厦屋靠牆立高大排叉木用粗繩橫編若造笆相似在其攻擊必不能爲害

一城不必太高太高則積雨摧塌修築費力城面不可太闊太闊則砲石落在城上緩急擊中守禦人城面通鵲臺只可一丈五尺或一丈六尺高可三丈或三丈五尺沿邊大郡城壁高亦不過五丈闊不過二丈而已

一羊馬牆舊制州郡或無之其有者亦皆低薄高不過六尺厚不過三尺去城遠近各不相同全不可用蓋羊馬城之名本防寇賊逼逐人民入城權暫安泊羊馬而已故皆不以爲意然捍禦寇攘爲利甚溥當於大城之外城壕之裏去城三丈一云去城二丈築鵲臺高二尺一云高三尺闊四尺臺上築牆高八尺

一云高脚厚五尺一云厚及六尺上收三尺每一丈留空眼一箇以

備覘望遇有緩急卽出兵在羊馬牆裏作伏兵正是披城下寨仍不妨安泊羊馬不可去城太遠太遠則大城上拋瓢不能過太近則不可運轉長鎗大凡攻城須填平壕方可到羊馬牆下使其攻破羊馬牆亦難爲入入亦不能駐足攻者止能於所填壕上一路直進守者可於羊馬牆內兩下夾擊又大城上瓢石如雨下擊則是一面攻城三面受敵城內又有一小砲可施凡攻城器械皆不可直抵城脚攻計百出皆有以備之也

一羊馬牆內須酌量地步遠近安排又木作排叉門分布安排人兵易於點檢兼防姦細入城

一城郭舊制只是一重城外有壕或有低薄羊馬城者使善守者守之雖遇大敵攻計百出亦可退卻或不經歷攻守者忽遇大敵圍城無不畏怯須是先爲隄備當於外壕裏修築高厚羊馬牆與大城兩頭相副卽是一壕兩城更於大城裏開掘深闊裏壕上又築月城卽是兩壕三城使攻城者皆是能者亦無可攻之理大抵城與壕水一重難攻於一重至若裏城裏壕則必不可犯計羊馬牆與裏城裏壕之費亦不甚多若爲永久之計實不可缺

一修築裏城祇於裏壕垠上增築高二丈以上上設護險牆下臨裏壕須闊五丈深二丈以上攻城者或能上大城則有裏壕阻隔便能使過裏壕則裏城亦不可上若此則不特可

禦外敵亦可潛消內患裏城裏壕費用不多不可不設庶免臨急旋開築也

一修城舊制多於城外脚下或臨壕栽了义木名爲鹿角大爲無益若城中人出至鹿角內壕外人施放弓弩鹿角不能遮隔若乘風用火可以燒燬不如除去爲便也

一今來修城制度止是在外州郡城池若非京都會府須於城內向裏量度遠近再於外修築一重其外安置營寨向裏更築一重作官府若此豈特堅固而已哉內外之患無不革盡

一攻城用雲梯是欲蟻附登城今女頭上旣留品字眼又有排叉木又有羊馬牆重重限隔則雲梯雖多無足畏也

一攻城用洞子止是遮隔城上箭鑿欲以搬運土木甑石填壘壕塹待其填平方進攻具或欲逼城剗掘今既有羊馬牆爲之限隔則洞子亦自難用

一對樓則與城上樓子高下相對鵝車稍高向前瞰城頭向下附城脚天橋與對樓無異止是於樓上用長板作脚道或摺疊翻在城上皆是登城之具今羊馬牆既有人守自可兩邊橫施器刃敵人別用撞竿與其他應急機械自不足畏大凡攻城用天橋鵝車對樓火車火箭皆欲人驚畏有以備之則不能害

一攻城多填慢道有至三數條者高與城等直逼城頭今羊馬牆中既有人拒敵又大城上拋擲甑石自然難近大城更

照所填幔道於城內靠城脚急開裏壕垠上更築月城兩邊栽立排又木大城上又起木棚置人於棚上又於欲來路上多設籤刺使能登城亦不能入城或能入城亦不能過裏壕縱過裏壕決不能過月城以幔道攻城者百無一二今所備如此亦何足畏凡攻城者有一策則以數策應之

一攻城用大砲有重百斤以上者若用舊制樓櫓無有不被摧毀者今不用樓子則大砲已無所施兼城身與女頭皆厚實城外砲來力大則自城頭上過但令守禦人靠牆坐立自然不能害人力小則爲牆所隔更於城裏亦用大砲與之相對施放兼用遠砲可及三百五十步外者以害用事首領蓋攻城必以驅擄脅從者在前首領及同惡者在後城內旅碑

在城上人照料偏正遠近自可取的萬一敵砲不攻馬面只攻女頭急於女頭牆裏栽埋排叉木亦用大繩實編如笆相似向裏用斜柱撐搶砲石雖多亦難擊壞砲旣不能害人天橋對樓鵝車幔道之類又皆有以備之則人心安固城無可破之理

一攻守利器皆莫如砲攻者得用砲之術則城無不拔守者得用砲之術則可以制敵守城之砲不可安在城上只於城裏量遠近安頓城外不可得見可以取的每砲於城立一人專照料斜直遠近令砲手定放小偏則移定砲人腳太偏則移動砲架太遠則減拽砲人太近則添拽砲人三兩砲間便可中物更在砲手出入脚步以大砲施小砲三及三百步外若

欲摧毀攻具須用大砲若欲害用事首領及搬運人須用遠

砲砲不厭多備若用砲得衝城可必固其於制造砲架精巧

處又在守城人工匠臨時增減製造砲梢須及時月夏以六

機木檀木皆一生筍長成少枝節者置溝渠中淹浸百餘日

或半年取出去皮陰乾用穩木上下自根至梢按捺如張盤

新弓相似取畧無損者然後用麻索生皮相間繫扎以防陰

晴緩慢日晴則皮緊索緩陰雨則索堅皮緩若此繫扎可保

失無

一用砲摧毀攻具須用重百斤以上或五七十斤大砲若欲

放遠須用小砲只黃泥爲團每箇乾重五斤輕重一般則打

物有準圓則可以放遠又泥團到地便碎不爲敵人復放入

城兼亦易辦雖是泥團若中人頭面胷臆無不死者中人手

足無不折跌也

一城被圍閉城內務要安靜若城外有人攻擊城內驚擾種
種不便須是將城內地步分定界分差人巡視遇有人逼城
號令街巷不得往來非籍定係上城守禦及策應人不得輒
上城在城上人不得輒下城過當防閑不特可免驚惶亦可
杜絕不虞

守城錄卷二

守城錄卷三

湯琦德安守禦錄上

王在黨忠寇德安二十日引去

靖康元年十二月二十一日羣賊王在黨忠問僅薛廣等攻陷隨州守臣陸德先以下俱逃或盡室遭擄遂犯德安府知安陸縣事陳規先被差部押縣兵赴京行至信陽羣盜梗路二十八日承府牒抽回赴府捍禦二十九日還至應山縣七里河賊夥閭僅千餘人在寮子市置酒張樂邀截歸路二年正月初一日規率同部押官知應城縣宋理應山縣丞權縣事夏輦各以所部弓手土軍召募人合五七百餘人給甲定安陸縣弓手節級馬立黃冕召募人雷智和管界巡檢寨土

軍劉允應城縣弓手節級李吉三川寨土軍向吉應城縣弓手節級竹清三縣巡檢寨土軍楊素凡八人徑領衆入應山縣掩殺羣賊僅等大敗餘黨潰散投入王在夥中王在寨去府百餘里規尋得路將所部兵到府時知德安府李公濟已往諸處招集人兵通判周子通先往諸縣起發民兵及士曹張顏悅因賊至驚死司錄士曹局務官安陸縣丞簿尉皆緣故搬家遁去初三日城中官吏軍民推規權領府事初六日通判周子通回府當日規交府事與通判準府牒規權通判仍充統領守禦人兵迎敵規遂措置修築城壁召募膽勇刷差軍兵勾抽保甲隄防守禦十一日知府李公濟回更不交割牒府乞折資監當卽日離任去十三日王在人馬入府界

劫掠十四日權兵曹應城主簿曰緯出城逃走十五日賊遊騎數十人至城下與城上人相射至晚回寨十六日王在領馬步五千餘人著顏色衣各執弓箭背牌及板門扇來圍城攻諸門委管界巡檢胡善三州都巡檢張惟德出戰二人先走匿於孝感縣九嶷山寺是日賊與守禦人相射申後賊退往府東天慶觀泰山廟等處下寨十七日賊又攻城賊首王在及近上首領多在齊安門外規與權府周子通城上呼賊與語諭以禍福賊暫退是晚周子通驚中風疾十八日牒府在假本府止有規及安陸縣尉董貽兵馬都監趙令弋監酒稅務趙康輔四員而已於是官吏軍民又推規權領府事規以城危急不敢辭遂糾率官吏軍民多方措置盡死堅守是

日賊搬積柴草欲燒齊安門守門人於未到十餘步先放火
箭焚之賊又用松柏長木及大竹雲梯五十座齊力並進城
上人用磚石及連蘸棒長鎗弓弩拒退良久遣人縋城毀斫
雲梯二十日賊列騎成陣逼城騎人擡鵝車洞子樓座用牛
皮并氈包漫攻齊安門被城上人及城門上門空處先以撞
竿托叉抵定次用搭鈎鈎去洞子上皮氈墜大石及磚石摧
擊又用弓弩箭射其賊退去續次下城焚燒毀斫盡絕賊又
進雲梯約高二丈各有梯道四圍用棉被并氈皮包裹煙火
箭鑿不可侵近約用四五十人擡擁向城被守城人先以長
竹併力撞無雲梯傾倒壓死賊數人次磚石弓弩箭射擊賊
人走退是日賊又進天橋約高二丈闊一丈以木長四丈餘

可以並行數人如城之幔道用以登城賊衆數十人擡以向城被城上人用弓弩磚石射擊致擡者止於十步外不能前進又於諸攻具之外列大砲十餘座四面向城飛石擊守城人其城上人存身向篋籬以避之城下人向木柵存身以避之致其砲並不曾傷守城之人是日賊又前以步後以騎列陣向城城內多設砲座城上人看覷賊近遠向著諭與定砲人向賊放擊發而多中其賊遠退只於城東十餘處下寨自是每日遣人至城下相射鬪敵及四散燒劫畧無退意三十日早又有黨忠人馬五六千人齊到城下著雜色衣與王在兩夥同來爭先攻擊四面環繞風水不通規與機宜閻孝周登城招王在諸酋至城下開說大義薄許犒設賊意稍解又

招賊大將蔣宣入城置酒款說禍福却令出城二月初三日王在引兵去黨忠人馬仍用洞子火炬齊攻城門被城上人用撞竿磚石弓弩箭拒退當日景陵門下打死賊五人并砲打殺鼓賊一名是夜三更賊乘暗忽由四邊擡雲梯上城被城上人用鎗及磚石刺打下又攢火炬燒望雲朝天齊安等門又用長鉤鉤城上人又用竹木縛荻把作火炬長二丈列二三百炬如火山向城門及燒城上竹城篋籬並被守城人併力用撞竿托叉抵拒及用磚石弓弩箭射并放砲石如此鬪敵自三更至曉方暫退初四日早規見攻擊危急賊不肯遠退遂點第一隊第三隊人兵開朝天門出乘賊不備分頭掩擊黨賊敗走卽收兵入門却開景陵門令第二第四隊并

第一第三併力出門掩殺其賊大敗乘勢趕逐除斬獲生擒外逼入湟河死者不知其數餘黨遂潰是日奪到旗六十三面鼓四十面鉦五面鎗刀二十三條牌十五面甲七連弓三張弩二枝牛五十二頭馬九十匹騾五頭驢十二頭自正月十五日至二月初四日凡攻圍二十日今考具措置於後

一踏逐過往寄居官進士勇敢者借補官資差攝職事

一選募有心力百姓分布諸門上城禦敵乃分認地頭譏察姦細及催督修城人夫工役

一差使院典級黃謹等行軍期司專一行遣防城守禦修城文字及各帶器甲隨規巡城

一選差安陸縣吏楊玠等提轄防城軍民弓手日夜巡邏及

催促添修城壁

一差撥軍民弓手分作四隊及選差弓手節級長行每二人共管押一隊內馬立馬政管押四百一十五人李全許進管押三百一十六人郭政田全管押三百六十五人劉德李清管押三百五十人各分布城下準備出戰

一差撥有心力膽勇保正隊頭黃壽等部領保甲人兵一十六隊計八百餘人準備出戰

一招集到茶客楊政等自招募人準備出戰并僧雷知和自招募僧行百姓二十六人殺賊

一城上極是尖狹有不及一尺闊者其上不能容立一人及無女頭尋於城上裏邊用鋤鏝直削向下三尺以代女頭下

城磴道添造竹木棚棧令人坐立可以施放弓箭等器械守禦

一城壁卑矮遂於城外添立竹棚間安篋籬外可以遮隔弓箭內可以施用兵仗於土城之上又立竹城一層

一城有極卑薄處遂於城內脚下離城三尺別立木棚一重約高一丈五尺間空五寸立木一根於城稍低薄處無不週遍係於土城之內又立木城一重於木城之外每兩步立一人與城上更互上下守禦

一城門薄怯損敝尋於門外別立小門一重各以氊皮釘裹上開門頂空隙以備墜石及下施兵仗又於門內兩邊栽立枋木作鹿頂約高一丈五尺長五十步其中路闊六尺至盡

處用木拒馬四五重閉定每五寸立木一根兩邊木外每步立一人持長鎗

一城上以千字文爲號每步一字每字一人以五人爲一甲十甲爲一隊互相統制分布城上又以在城火夫客戶置籍結甲上城守禦

一選人兵一百五十人令保正副六人甲頭二人管押統領晝夜準備應援如東壁有報警急卽提兵東應西則西應自攻圍二十餘日每有警急無有不至者

一於賊退之後其未遠止在城外側近圍繞之中寅夜偷工開壕築城仍命工人計城厚薄而中分之先併力以築其表高及尋丈度不可以驟登則又併力以築其裏適相當然後

增築以成之內具畚鍤以督役外荷戈矛以備警起五邑之夫萬人竭作不淹時而畢

一城壁長八百八十二丈高二丈五尺上闊一丈六尺底闊三丈七尺五寸及於城壁外開築城壕繞城壕塹計長七百八十八丈上闊三丈底闊一丈八尺深一丈五尺

張世李孝義寇德安四日引去

建炎元年九月二十二日李孝忠餘黨張世李孝義賊馬五萬餘衆已破襄陽荆門軍荆南府郢復州遂寇德安府先行文字稱欲就招安一面擺拽兵馬環繞府城本府以方議招安未敢禦敵是夜五更一點忽全時發喊雲梯火砲弓弩箭鑿攻城勢焰兇猛本府官吏軍民以死禦賊至二十三日已

時賊始退是日矢石殺死賊兵三百餘人賊拽屍以去沈之河及積薪焚之被傷一千餘人諸門奪下雲梯七十餘座二十四日夜賊兵又乘暗至西北兩門以城上肅靜隄防不能下手夜半引去其時有御營使司同都統制范瓊討捕李孝忠等領兵在府北累遣至城下應援掩擊不至二十五日拔寨南去

楊進寇德安一十六日引去

建炎二年二月初四日羣賊楊進號沒角牛領衆至本府城外四面下寨遣人齎文字來稱有衆一百五十萬馬三萬五千餘匹自京東登萊沂密濰淄徐等州前來逐州官員盡皆勦殺本府視賊寨約有十餘萬人馬三千餘匹是日晷來脅

城不多時各退歸寨初五日以後朝暮繞城矢石所不及處
擺布人馬三五重更番替換又於前分布攻城人馬大振金
鼓喝喊馬軍在後用刀鎗擁逼步人并力攻城一齊發弓弩
及神臂弓箭鑿射城上人并持雲梯四面奔城被城上守禦
人弓弩箭鑿砲石磚石雨下賊並不曾得利城中時出兵衝
殺賊遂少退四五日後賊復添立攻具高起望樓下瞰城中
并造戰柵對樓洞子用牛皮包幔又用夾布作遮箭幕約高
三丈箭鑿皆不能害又立大砲攻具日增夜遣人搬柴草向
羊馬城并城門放火亦被守禦人救護撲滅并矢石禦退賊
不得利十七日增望樓四座大砲五十餘座洞子一百餘箇
遮箭布幕三十餘座大戰柵一座對樓一座及雲梯不知其

數其戰柵約高二丈四方各闊一丈六尺有餘先用人裏外
擡奔向城被城上人用弓弩箭鑿并砲先射打退擡奔人及
打得傾側使用不得棄下退去其對樓約高四丈闊一丈五
尺有餘作五層縛木梯斜上高過于城其勢太重推拽難行
兼被城上守禦人施放矢石射打推拽人莫能近前其餘遮
箭幕盡被砲石打得碎破其洞子湊成又被城上墜下柴草
積火焚燒皆不得近前其砲亦被城內放砲多打殺定砲人
其賊凡所立攻具一一施用數日皆不能傷城上人自初四
至十九日計十六日逐戰鬪殺傷賊數多賊知城不可攻二
十日方遣人至齊安門下高聲呼城上人且不要放箭防禦
教來打話當時城上人問打甚話其人言恁也不出來共俺

廝殺我也打恁城不破有招安官來俺只待要些犒設受招
安城上人答待恁受招安了與恁犒設其人便去至晚有一
人著紫道服領二十餘人持東京留守司請召旗一面向城
隔壕與城上人說話稱是東京留守宗元帥使臣成忠郎王
申元帥遣來招安楊防禦高聲讀示宗元帥咨目并劄子言
楊防禦今日方肯受招安待問本府要些犒設并出券往東
京本府許之二十一日送犒設在城外其楊進領人親到齊
安門下收受致謝而去是日楊進領衆起離向信陽軍前去
契勘楊進自三月初四日圍城攻具甚盛被城上人施用弓
弩箭鏐砲石磚石射打死損賊人數多及出兵衝殺入壕淹
死者五十餘人及於壕內撈漉到賊屍於沿身搜到借補使
臣文帖四道及被擄人回稱楊進被箭射着頭又被磚砲打
着額倒臥累日後起來喚在邊將官不來扶救斬之又聽得
楊進言自出京以來不曾折了人却到這裏折却許多又折

了強將四員見得楊進
計窮力盡方受招安

孔彥舟三次寇德安皆不克引去

建炎二年十二月二十八日有北來一項羣賊數萬人稱是
單州團練使郢州鈐轄孔彥舟在黃州麻城縣作過至三年
正月初七日賊至黃州皆剃頭辮髮作金人裝束是夜填塞
壕塹用雲梯及牛皮洞子安立砲座攻圍黃州城及肆掠黃
陂縣并侵犯德安府孝感縣界本府慮賊來犯城遂分布官
吏軍民於諸門地方嚴行隄備其賊迤邐至孝感縣東舊鎮
殺人放火劫掠財物二十四日到環河鎮殺傷已受范瓊招
安下吳錫人馬二十六日到府東十八里下寨稱是武經大
夫榮州團練使東平府兵馬鈐轄京東西路統制軍馬孔彥

舟二十七日領全軍數萬至府城下四外占岡擺布搭立施設弓箭射城上守禦人被城上人齊發砲石弓弩賊衆不敢近當夜遁去向隨州前去至閏八月十一日復自光州回至本府應山縣作過再占據隨州九月初一日分遣賊騎侵犯本府圍城本府乘時出兵掩殺初八日賊遁去復回占隨州十一月初一日彥舟又自隨州領人馬至本府城下圍繞劄寨初八日大隊併至攻城被本處守禦人施放弓箭箭鑿砲石禦敵至晚退却止在城外初九日拔寨南去占據復州又往占據荊南府

正月二十七日攻城當夜引去九月初一日攻城初八日引去十一月初八日攻城

次日引去

董平寇德安三萬人卽日敗去

建炎三年三月羣賊董平部領人馬至應山縣稱勤王兵沿
路劫掠四月初四日夜掩劫孝感縣官吏居民逃走有不及
者悉爲驅擄乃燒盡一縣官私屋宇是日在本縣東舊鎮劄
寨分遣賊徒剽掠本府差撥人兵六頭項前去掩殺董平起
離取唐州去九月十二日有宣撫處置使司差知信陽軍武
經郎孫璘到本府差兵護行至信陽交割至十二月二十日
董平破信陽璘僅以身脫其家并官屬皆沒於賊平差人占
據信陽自往唐州大義山劄寨令隨唐信陽三郡人戶送納
糧草并收逐處稅錢四年三月十六日平領三萬餘衆到本
府本府差正將辛選發兵往應山界迎敵戰數合賊大敗走
殺賊千餘人鉦鼓旗鎗弓箭器械輜重棄之滿道平尋走往

西京界爲鄉村把隘人所殺

守城錄卷三

守城錄卷四

湯壽德安守禦錄下

趙壽寇德安三日引去

建炎四年五月十二日羣賊趙壽號不忙自黃州領衆數萬餘人至孝感縣界劫掠遣人至本府欲就招安是月有朝奉郎守尚書兵部員外郎福建廣南東西荆湖南北等路撫諭使馮康國到本府守臣陳規白馮乞行招安會趙壽亦遣人以書與馮願受招安規復遣人往壽寨說以撫諭肯行招安之意六月初二日壽領衆至城外是晚馮親出城見壽初三日壽攜數隊入城聽撫諭聖訓謝恩招安了當馮牒壽令權於江州黃州駐劄聽候朝命本府亦支給錢糧犒設訖十二

日壽起發至東四十里環河鎮駐劄忽夜遣人馬分頭項於本府八門改換色衣僞作民兵裝束一擁奪門賴諸門守禦素備卽時以死捍禦旋增弓弩砲石鬪敵至巳時方退復放箭砲不及處擺布圍城迭來攻打被城上弓弩砲石不歇及遣兵披城出戰三晝夜計窮力盡二十日賊拔寨南走

曹成李宏寇德安自六月至二月引去

建炎四年六月有曹成李宏賊自舒州歷光州信陽至本府衆數十萬布滿諸縣直抵襄陽郢州界駐劄三龍河時早禾始熟廣被芟掠本府以賊兵衆盛不輟隄備七月三十日賊兵至城下攻打府城本府一面施放弓弩箭鑿砲石一面發兵出外披城鬪敵賊不能破巳時方退八月十四日衆賊又

至城下本府再發人兵出城迎敵賊復退於近城桐柏廟下立寨分遣騎於八門一二里外立小寨圍困本府不通往還本府官吏軍民以死捍禦間出兵掩殺每夜遣兵劫擾小寨奪糧入城晝夜相拒六十餘日是時成等人馬寔多本府兵極少其勢不敵遂設計謀差人齎公文前去問商成等誘以禍福利害指其自新之路成等始退十月初三日遣人入城商議稱一行兵衆元非爲賊止爲鄉中不可居止遂前來尋有糧吃用却蒙朝廷收還招安之後所授官職止乞元來官資湔洗招安之民及齎到成等申狀本府於初五日備錄奏聞成等始於十六日復還三龍河大寨仍不住於府城四外燒劫又因本府抄截掩殺之故十一月二十四日復領衆來

攻城本府出兵迎敵至午方退五年二月十九日成等領衆起離三龍河往漢陽軍渡江前去

桑仲夏邢尚孫羣賊寇德安三月引去

紹興元年十二月初四日有信陽軍邢舍人尚統領等部領二千餘人至本府城下焚掠本府卽時閉門捍禦雖稍退未肯遠去十七日又有隨州孫彪統領人馬三千餘人亦來圍城本府閉門捍禦及遣兵出城戰殺傷百餘人方退亦未肯遠去二賊梗路不通二十日夜賊齊至城下弓弩箭鑿雲梯布牌攻諸門本府官吏軍兵拒敵二十一日早始退離城百步外圍繞是夜信陽軍賊馬前去攻孝感縣不克復回本軍隨州賊馬前去攻復州陷之二年二月二十八日再發人馬

兩路前來本府近城四外焚劫本府官吏軍民晝夜上城不
曾解甲以死捍禦及時出兵掩殺三月初間始退向隨州去
續據忠訓郎權孝感縣韓通狀准鎮撫使差權縣事踏逐到
離舊縣一十里臨湏河地名紫湏就周圍積水爲壕創築城
壁欲就緒間十二月二十四日有信陽軍賊馬二千餘衆自
府城來奔本縣先二百人到城北通卽分布守禦發兵迎敵
賊敗走五里逢賊大隊至復圍縣城施放弓弩尋於壕外呼
曰慙是信陽大後軍邢舍人尚統制人馬向北打了一百八
十座山寨壞了鄧州信陽軍并天目山寨今決要取本縣屯
泊人馬就糧贍軍圍至夜只於壕外分布劄寨二十五日賊
掠湏河客船載兵入壕及用布牌木牌遮箭擡奔雲梯五十

座向前水陸攻縣城被本縣人施弓弩砲石併力捍禦至晚賊退回寨二十六日賊多拽河內船舫五七隻爲一絞用大竹絞成竹牌立於船頭旋添船併作浮橋於北壁壕內攻縣城城上弓弩砲齊發敵不能近復拽船泊岸只攻東北亦被禦退至夜回寨遁恐賊別生計遂親領兵三更出劫賊寨殺賊三百餘人及收到被擄男女五百餘人入城二十七日賊於壕外添砲數座及分布船隻向前攻城至午禦退二十八日又以雲梯向前併力攻城至夜禦退二十九日賊又用船六十餘隻通作一絞用板釘鋪船面船頭並用竹木布牌兩頭遮箭後立長槍五百餘人撐拽攻西壁勢兇猛遁激勵人兵西門放出戰船十五隻於壕內及城上弓弩砲石齊發至

未時賊大敗渰溺無數盡奪所絞船舫其岸上擺立賊兵卽時回寨至夜拔寨遁去

李橫寇德安六十五日引去

紹興二年六月十三日桑仲餘黨知鄧州李橫號九哥哥領襄陽府鄧隨郢州所管軍馬及逐州百姓共約五六千人內正兵約四千人前來德安府近城下寨大小七十座賊首李橫大寨在城西隔河早晚舉平安火諸寨相應遇夜諸寨有警卽時舉火每寨各立望樓樓上人執白旗城北東西三面各正視城門門內人出入必先見出稍多卽舉旗向門本寨及兩邊連寨人競出掩撲或城內出兵迎敵及劫寨卽時諸寨舉旗指示悉來應援城南有望樓四座占高阜下瞰城內

街巷往來動息皆見之城上守禦人人可數纔見城內稍以
擺拽卽舉旗諸寨各爲備夜於四外更互相應把斷出入之
路圍閉府城內外風水不通本府雖不住出兵鬪敵終是兵
少難勝亦嘗於城上招到橫親近打話諭以禍福橫只以本
府收藏霍明爲辭誣執本府順番必要打城七月初三日五
更一點城外發喊用弓弩箭射城上人及將雲梯到城搬草
擁門火之城上人用弓弩砲石磚石射打不能上城至辰時
賊退雲梯六十餘座皆棄下初四日橫親領衛兵往隨州至
襄陽府喚木匠鐵匠搬取牛皮繩索及於大洪山取氊及索
十餘日回來再造天橋洞子三梢大砲及雲梯等攻城器械
八月初四日攻具成至城西南角下寨裝斲天橋衆填壕一

夜平初五日入遠壕內立大砲七座攻打城上人其砲石小者不下十斤大者四五十斤用大木造四脚洞子一箇長約二丈闊丈五脊高丈二以上用濕柏木大椽密牌牛皮漫之面與兩邊用木椽并厚氈簾其脚高四尺五寸厚似癡車脚其狀如兩間屋推臨裏壕用大木椽絞成狗脊洞子接連兩行各長五十餘步并厚木板牌二百餘面遮護賊人搬運草木磚石填裏壕數日斫就天橋脚共六隻高五尺厚薄一如洞子脚長六丈以上闊二丈高三丈五尺以上近及四丈上闊一丈以上當頭自下至上斜高向前約一丈以上中下三層當面并兩邊及頂上皆用牛皮厚氈毯棉被掛搭其天橋底盤上復繫大竹索兩條各長二十餘丈每條百餘人牽

拽規暗料賊必是欲以砲打城門并城上人使住立不得然後進洞子向前填平壕便推天橋就城因以上城規卽時令人於城上照賊填壕處相對用大木置起戰棚一座上下兩層其上橫鋪大木三重及於城裏脚下深栽高木棚一所以防賊人萬一上城後若便下城則必陷在城中又於城上兩邊匝女頭牆密用大木埋起高排又柱遮隔砲石又於戰棚南北各東西橫埋排又柱兩重柱外各分布長鎗手并斬馬刀又於柱外各東西更置戰棚一座棚上各備磚石弓箭以備賊人萬一上城分頭兩向沿城殺入及防戰棚上下人不盡死禦敵者至於必死之地使之無不用命又於城裏相對賊定砲并填壕處亦立大砲七座內三座亦可施放砲石

重三五十斤至五六十斤者又於砲架前并兩邊高埋大木
砲架中心拽砲人上橫排木椽作砲棚遮隔賊砲每砲一座
用砲手三人更互使用城上照料城內放出砲石遠近偏正
一人城上戰棚下用大木兩條各長二丈四五橫用括木兩
條各長六尺當用橫木一條長一丈造就托竿一所又以乾
竹柴草造下火牛三百餘箇又以大枋木三條合就長板一
片約長一丈五尺有餘又以火砲藥造下長竹竿火鎗二十
餘條撞鎗鈎鎌各數條皆用兩人共持一條準備天橋近城
於戰棚上下使用又於兵衆中選用有膽勇人分爲十四甲
逐日輪當戰棚上下并排叉柱外及羊馬城外及準備諸處
緊急應援以安陸縣尉李居正統領又以副將馬立統領一

項入兵專點檢四壁守禦及攻城緊處策應幸而其賊所置攻城器具前來一一皆如所料賊所立砲七座不佳施放一十四晝夜雖打壞城上門樓并城門護板及打折排叉柱并戰棚上橫鋪木植但逐旋打壞逐旋添補立起並不曾正打著城上城內一人惟是城裏放砲出外遠近偏正有城上照砲人招呼令逐旋挪移轉動砲架及添減拽砲人數或砲石大小施放所以城外賊人稍有攢聚砲力可及處卽時打散其賊砲手并拽砲人多被打殺所有賊人狗脊洞子只於當日盡皆打倒并人亦打殺更不能使用惟有大洞子臨壕約中城內大砲二三百下方始打動上蓋少有損壞其當面極簾氊簾一齊打碎砲入洞子內打殺人多却推向前再修別

無牛皮作簾並簾裏硬排立木又向前來再打損壞方推拽
向後不用只擁驅擄到老少婦女搬運草木磚石填壕並不
顧城上箭砲打殺若是打殺近上首領并親近正賊卽馱背
或昇去窖埋若是打殺驅擄人并已下人卽時剮肉食用其
壕相近填滿方再以土傅城城上人併射火箭在所填草木
上偶值風順其賊衆向前打撲不及被火燒著兩三晝夜尚
未燒盡其賊又只用磚石并土相兼再填又兩三日相近填
滿其老少婦女死損外見存無幾兼近城脚難向前來遂選
壯健人與正賊牙兵相兼以布袋盛土走奔向前來并皮袋
撇下急走回去其搬運填壕并定砲拽砲及城下往來之賊
中箭并砲前後死損甚多其賊漸窘少闕糧食襄鄧隨郢四

郡界內人田種萬無一二回去亦難得食打劫已徧並無可劫除正賊近上甲頭人有些裝著餘人並藍縷惟指望打城後爲飽煖之計所以其賊攻城亦不惜他人命用意堅確不肯輕退八月十五日宣撫使司送到襄鄧隨郢州鎮撫使司書寫機宜文字譚憲公文稱朝廷已差李橫充襄鄧隨郢州鎮撫使又將譚憲文字付李橫照驗橫言便是朝廷差我做鎮撫使教我去那裏喫著甚底我也不能做得他鎮撫使我待打城破後相度十八日賊衆遂填平裏壕十九日四面分布打城賊安排下雲梯伺候同時下手及四外高阜處及要路上各布馬軍準備梢截城破走出之人至午時推天橋湊城西南角正是所填壕上於天橋兩邊擡雲梯三十餘座後

布長槍手約一千餘人發喊並鉦鼓齊發及弓弩箭砲石一齊施放射打城上守禦人其天橋口是近城規卽於城上戰棚脚下推長板出城頭數尺於板上併手推滾下大石於城外脚下打推天橋賊衆及推出托竿托住天橋爭一丈有餘不能到城其戰棚上下方欲施用火鎗捶鎗鈎鎌之次其天橋脚下人倒推并牽拽竹索人倒拽天橋急回約五十餘步方住得一時辰以上却向前來於天橋先行路稍近南行意欲閃避托竿無可行得近南地步丈尺稍多所填壕不甚寬處致陷住天橋東南前脚前來不得却向後拽又因人衆用力太多拽斷竹索進退不得致羊馬城內兵出與天橋下賊人用命鬪敵并城上磚石弓弩箭鑿賊裏砲石并下移時方

始殺退賊兵尋於城上推下火牛柴草被羊馬城內人並出
搬柴草積在天橋脚下焚之其天橋上併中隔內賊兵方始
慌忙走下一齊退却并遠城四外賊兵各被城上守禦人施
放弓弩磚砲射打退走棄下雲梯及向外高阜處并要路上
分布人馬一齊回寨其賊大敗當夜遁去契勘其則方來之時止有五六千人
自入府界百餘里驅擄人數甚衆皆以正賊監押收刈稻穀
搬材木置造攻城器具後來收盡田稻并梨棗等及造就攻
具一齊追收回寨併使打城共數實有一萬餘人雖人數不
爲甚多然所造攻具雄壯擺布施設次第似乎不容人力可
敵兇焰實爲可畏加之城內人飢餓雜草木皮葉食之凡守
禦六十五晝夜橫之攻城也久之不下一日遣人請議事規
在城上見之橫曰願得粟二百斛而去左右謂勿與規曰我
糧無幾橫來請是視我虛實不與卽謂糧乏攻益力去愈緩
與之則遁有日矣卽送與之明日橫衆攻城規坐城樓砲折
足指容色不變圍益急糧不繼諸將請提牛以食規曰殺牛
代食敵聞之圍猝未解矣乃盡取酒務麴蘖分給之仍搜家
財得萬緡以犒軍橫又遣人來云願得府之魁妓而後罷攻

諸時曰城圍七十日矣以一婦人活一城之衆不亦可乎規曰使橫卽退是我以婦人求和況未必退乎其再來當斬妓首以遺之孝感縣令韓適來告曰縣有粟百斛路絕不通規命乘風雨呵殿而來賊軍疑其有神不敢睥睨橫以天橋驚車逼城規曰技止此爾縱火焚之卽退因嘆曰使橫更七日不解麴蘖亦盡矣

湯璫字君寶潭州瀏陽人淳熙十四年進士授德安府教授先是建炎間陳規守德安屢經大寇皆應以閒暇於城上築鵲臺城外築羊馬城又於羊馬城外設木棚賊至輒敗後知順昌府府多儲粟計議司來起粟赴河上規請代以金帛已而金人圍城竟賴其粟以充軍食卒以破敵璫訪尋其事編爲建炎德安守禦錄紹熙四年璫除太學錄表上其書

右陳規守城法用於倉猝無備之中九攻九拒應敵無窮

十萬百萬靡不退却程式具存剖析尤備凡沿邊守宰細
繹此書思過半矣

守城錄卷四終

